













(\*) *Vetus Martyris epitaphium*

ACAPENIBENEMERENTIQUAE VIXIT ANNOS PLVS MINVS  
XXVI & O & FECIT CVM MARIO ANN-III DPOSITA  
IN PACE XVII KALIS EPT & FL & STILICONE VCCONSS

STEPH · ANTONII MORCELLI  
AGAPEA  
MIXAHAEA  
ET  
TESSERAE PASCHALES



BONONIAE  
EX OFFICINA NOBILIANA  
A. M · DCCC · XXII ·  
PERMISSU PRAESIDUM





LEGENTI  
PROSPERA . OMNIA

ALOISIO AMÁT

ANTISTITI URBANO

PROLEGATO PROVINCIAE BONONIENSIS



ANNESIUS NOBILIUS

TYPOGRAPHUS

*Quum constituerim, Antistes amplissime, Steph. Antonii Morcelli Agapea, Michaëlia, et Tesseræ Paschales meis typis excudere, consilium quoque cepi illa Tibi offerendi, ut singularis meæ erga Te observantiæ testimonium*



aliquod publice exstaret. Atque ut de eo cogitarem, fecerunt in primis et auctoris, cujus opera sum editurus, celebritas, et opera ipsa per se elegantiae, ut Morcelli omnia, suavitatisque plenissima, et digna profecto, quibus a tui nominis dignitate splendor accedat. Haec verò si, quae tua est benignitas, libenti animo exceperis, consilium hoc meum et litteratis hominibus haud improbatum iri confido, quorum potissimum postulationibus ferme impulsus, haec eadem evulgare decrevi. Quod ut mihi concedas tanto studio abs te peto, ut majori non possim. Vale.

**AGAPEA**  
**SIVE**  
**DIES FESTI**  
**AGAPES MARTYRIS**  
**APVD CLARENSES.**



20

ANTISTITI RELIGIOSISSIMO

GABRIO MARIAE NAVAE

PONTIFICI

MAGNAE ECCLESIAE BRIXIANAE



PAULLUS BEDOSCHUS

CURIO CANONICUS

*Quae in lucem edimus Agapea, tuo dicata sunt nomini, tuae oblata dignitati; tantillus quidem liber est, sed multis non exiguis pretiosior videri possit. Hunc Morcellus cultor omnigenae eruditionis, et latini pater eloquii, quem tu merito*



*plurimi facis, libens exaravit, meumque esse humanissime voluit. Is ubi in jus meum devenit, statim honori, et meritis tuis dicandum non dubitavi. In hoc Agapes Martyris Patronae nostrae monumenta quaedam, atque quanto etiam ipsa a Clarensibus in pretio ob beneficentiam ejus habeatur, facile cognosces. Ceterum quia impar ego commemorandis virtutibus, quae animum tuum exornant, munusculum hoc tantummodo tibi habeto quasi pignus obsequii mei, quod utique perpetuum fore spondeo.*

AVE · AGAPE · MARTYR · **P**

SALVS · POPVLI · CLARENSIS



**T**ibi quidquid hoc libelli est et qualecumque, Tibi, inquam, clientium tuorum nomine, Patrona optima, dictum volo, qui prior illustrem hospitam domi habui: eo autem consilio, uti sit monumentum indulgentiae erga nos tuae, et amoris erga te nostri, quam pio utique studio concordēs et colimus et colemus, extare enim memoriam par erat, qua voluntatis tuae significatione ad nos ipsa advenisses, ante propitia quam incola, ante faulrix quam civis. nec minus intererat, manare ad posteros, quo te primum honore suscepimus, et qua jam te reverentia observemus. utraque nimirum ad dignitatem tuam pertinent, ut norint omnes, quanta ipsa sis, et quanto in pretio habearis.

Tu vero perge, ut coepisti, indigentibus opem ferre, solari afflictos, subvenire aegris, mortem depellere, emendare mores, fovere concordiam, amplificare patriam, pudorem civium et sanctimoniam augere, de omnibus denique libenter, ut soles, benemereri. nos te, quantum fas erit, omnibus officiis prosequemur, atque in oculis ferentes per-



*petua caritate celebrabimus : reddituri gratias quam maximas , quando nos religionis pietate defunctos et omnibus  
lactitiis laetos ad Caelestium concilium coctumque deduces.*

Exigua haec parvi quamquam sunt dona libelli,  
Magna Agape, atque impar copia promeritis;  
Quae tamen hic fatur de te benefacta, nepotem  
Vsque unus doceat cuncta alium atque alium.

AGAPEA  
SIVE  
DIES FESTI  
ACAPES MARTYRIS  
APVD CLARENSES

PROOEMIUM

Quae Mabillonius olim, vir pietate idem et eruditione magnus, alieno primum nomine, deinde suo vulgavit, ut religiosum quemdam cultum notaret reprehenderetque, quo interdum ignoti Martyres prae insignibus clarissimisque honorarentur, (1) ea, opinor, contra nos valere non debent, qui Agapen nostram non uno titulo illustrem et vetustatis testimoniis ac celebritate famae commendatam ad nos pervenisse gloriemur. primum enim sacrum ejus Corpus, quod Pii VI. Pont. max. immortale munus fuit, sic Roma accepimus, ut nomen quoque ipsius cum integra tumuli Inscriptione teneamus, ex eaque tempus ac diem mortis ejus ac vitae item et matrimonii ejus annos didicerimus. (2) deinde hoc quoque compertum habemus, tunc sepulcro Martyris phialam sanguinis ejus appositam esse, quum Anastasius Pont.

---

(1) *V. Dissert. Mabill. ad ven. p. 557.*

(2) *V. Comm. in Epitaph. S. M. Agapen.*

max. tranquillis jam rebus Ecclesiae praecerat, et sacrum Cal-listi Coemeterium in honore habebatur. (3) favent praeterea quae accessere miracula, ab ipso die coepta, quo Romae in aede Mariana ad forum Trajani Corpus Martyris expositum est confluentibus ad visendum Quiritibus, et quae apud nos quoque iterata constat. (4)

Quantum vero ad Martyris dignitatem et gloriam valere debet, quod demum a Pio vii. Pont. max. Ecclesiae nostrae datum sit, ut bis quotannis honori Martyris sacri facienda jus esset? (5) unde populo huic nostro et patrocinii caelestis spes adfulsit major, et colendae Martyris studium adcrevit, quod si factum etiam vidimus, ut nomen ejus infantibus parentes libentissime imponerent, quemadmodum apud Sarmatas contigisse accepimus, (6) postquam ad eos Corpus Floriani Martyris delatum esset, eo nostri religiosius usurpare potuerunt, non modo quod nomen idem aliis quoque Martyribus commune fuit, (7) sed etiam, quod Christianam caritatem designet, quam saepe Paullus Apostolus in ore habuit: quod quidem nomen in recto casu *Agape*, in obliquo *Agapes* fuit; quamquam sequiori aevo *Agapes* usurpatum invenies in recto, in obliquo autem *Agapenis* aut *Agapetis*, unde *Agapetilla* est, uti leges apud Marangonium: (8)

(3) *V. l' Omel. detta nella Traslaz. p. 11. 12.*

(4) *V. quae infra narrantur.*

(5) *ex Rescripto anni M. DCCC.*

(6) *V. Baron. an. 1184. in fine.*

(7) *V. Martyrol. Florentini etc.*

(8) *in opere delle cose gentilesche ec. p. 315.*

*et Lupium in Epit. Severae M. p. 157.*

( XIII )

AVR • AGAPETILLA  
ANCILLA • DEI • QVE  
DORMIT • IN • FACE  
VIXIT • ANNIS • XXI  
MENSES • III • DIES • IIII •  
PATER • FECIT

at nos *Agapen* veteri more vocitamus, Grammaticos sequuti, non plebem Latinam, quae litteris senescentibus multa hujusmodi nomina vitiavit atque corrupit. (9)

Iam vero his animadversis, nemo jure miretur, si Nolanum Paullinum imitati, qui Felicem illum suum ob cruciatus jampridem pro Christo toleratos Martyribus adnumeratum, non solum molitione operum et cultu eximio, sed annuis etiam laudibus carminibusque exornavit, *Agapen* ipsi nostram studio aliquo et commemoratione prosequamur. atque illud etiam facile ab omnibus concedetur, ut qui de ejus festis diebus acturi simus, quos hic quotaunis celebramus, historiam antea receptae Martyris delibemus, unde prima ejus sollemnia apud nos exordium duxerunt.

Vetus Hypogeum Basilicae nostrae satis magnum et amplum, quod Majores neglexerant, impedimentis demum rejectis et squalore deterso, jam ab anno M • DCC • LXXXII • religioni et pietati civium patebat, v • idus Novembres rite expiatum, quemadmodum Inscriptio declarat, quae imminet Australi portae:

---

(9) *V. Lupium ibidem.*

DEO • IESV • SERVATORI • GENERIS • HVMANI

CLARENSES

SIGNO • EIVS • EX • AEDE • MARIANA • TRANSLATO

HYPOGEVM • NOVO • CVLTV • EXORNATVM

V • IDVS • NOV • ANNO • M • DCC • LXXXII •

DEDICAVERVNT

ibidem vero quum altare extrueretur, Praepositus Ecclesiae nostrae de sacro corpore Martyris alicujus ab urbe impetrando primitus cogitavit, ejusque rei causa aptum sub altari locum arcae recipiendae parandum curaverat, magno operis totius adjutore Francisco Andreio Canonico, quem et Hypogeo praefecerat, viro excellentis ingenii consiliique, cui maxime tribuendum est, quidquid in hoc sacrario ab ipso initio comptum perfectumque probatur. (10)

Exinde autem Praepositus litteris Romam ad amicos duos missis rogare eos atque obsecrare coepit, ut alter, (11) quem Pio VI. P. M. acceptum norat, donum ab eo pulcherrimum, Martyris nempe Corpus postularet impetraretque; alter vero, (12) si res bene succederet, ipsum Corpus a

(10) *Amisimus virum hunc pientissimum et de patria optime meritum viii. Kal. Octobres an. m. dccc. v. cujus loco succrescit Andreas fratris ejus filius, exemplo idem et doctrina ac laboribus Ecclesiae nostrae jamdiu perutilis.*

(11) *is fuit Vincentius Bolgenus, Theologus aetatis suae praestantissimus, a consiliis V. E. Praefecti criminibus expiandis, scriptorque operum plurimorum.*

(12) *is vero Philippus est Salvatorius Theologus idem et*

probo artifice, ut mos est, pro dignitate vestiri juberet, idque ad nos in designata arca rite clausum transmitteret. rem uterque gessit egregie; nam et Pontifex maximus, qua erat humanitate, benigne supplicanti obsequutus, quod unum tunc in sacrario ejus servabatur Martyris Corpus, id est Agapes, nobis donari jussit: et arca illico affabre constructa, sacrumque in ea Corpus compositum est, praeclaro matronae ornatu indutum, quale nunc sub altari spectamus. itaque beneficii, quod Pius nobis non modo impertivit, sed aliis etiam beneficiis cumulavit, memoriam in Hypogeo consecrari posterisque relinqui oportebat, quam non procul ab altari ad laevam leges:

V • EID • SEPT • AN • M • DCC • LXXXV •  
 INDVLGENTIA • PI • VI • PONT • MAX •  
 CVIVS • AVCTORITATE  
 SANCTVM • MARTYRIS • CORPVS • OBVENERAT  
 DATVM • QVOQVE • CLARENSIVS  
 ADTRIBVTVMQVE • EST  
 VII • XVII • KAL • SEPT • QVO • DIE • AGAPE • BEATISSIMA  
 POST • AGONEM • SVVM • ROMÆ • QVIEVIT  
 SOLLEMNIA • QVOTANNIS  
 HONORI • EIVS • RITE • INSTAVRENTVR  
 VTIQVE • EODEM • DIE • QVOTQVOT • POENITENTIA • EXPIATI  
 SEPVLCHRYM • CAELESTIS • PATRONÆ • ADIERINT  
 ET • SANCTA • DE • ALTARI • LIBARINT  
 ADMISSORYM • POENA • OMNI • POST • SYFFPLICATIONEM  
 ABSOLVTI • DISCEDANT

---

*Historicus egregius, qui nunc in Sicilia inter veteres  
 sodales degit. porro ambo ad Societatem Jesu pertinent.*

At quae modo commemoravimus, diligenter peractis, Episcopus Porphyriensium, qui tunc a sacris erat Domus Pontificalis, omnia ex auctoritate recognovit, atque exempto sanctae Agapes Dente, quem separatim in thecam argenteam inclusit ad eorum solatium, qui hic supplicantes exosculari vellent, omnia item anulo suo obsignavit, litterisque publicis testatus est, tantum illum thesaurum ex Callisti Coemeterio prodiisse, atque ad nos esse transmissum. nec multo post arca cum lapide sepulchrali in capsam ingentem conclusa est, essedumque inventum, quo ad nos longo per Apenninum itinere, ac deinde ab Ancone per mare usque ad Padi ostia, demum per Padum ipsum Ferraria tenus deveheretur. inde secum Navicularii Pontevicenses per Ollium traducere debebant: qui tamen recusarunt, veriti nimirum, ne sacra illa arca, quam Roma integram intactamque adlatam eo usque videbant, incuria ipsorum aut periculo aliquo detrimentum faceret.

Ergo hinc Andreus Canonicus Ferrariam ipsam sibi cum delectis viris properandum existimavit, ut venerabile illud divinae liberalitatis pignus, tamdiu ab omnibus exoptatum, ad nos quamprimum ipse perferret. pridie nonas Ianuar. anni M • DEC • LXXXVI • profectus negotium strenue confecit, et sacro Corpore per Padum Mantuam deducto, inde nuncios misit, propediem se adfuturum. hic vero re apud omnes pervulgata, quum omnia parata essent, templumque maximum omni cultu ornatumque niteret; supplicatio statim indicta est, quae caepit xvi • Kal • Februarias. postridie sub occasum solis in via Braxiana currus apparuit scricis aulaeis insignis, quo Hospitae sanctissimae illustres exsuviae advehiebantur in triumphi morem, multis hinc inde plaudentibus, et Agapen numerose inclamantibus, Agapen mo-

( XVII )

dulate canentibus. nam pueri in primis ad plura millia  
obviam processerant, vexillum quisque suum gestantes, ut  
Apagen primi salutarent. quo spectant Hendecasyllabi, quos  
hic juvat adscribi:

Ite jam, pueri, obviam: Patrona  
Caelestis venit ipsa ab urbe Roma,  
Clarensisque Agape futura gentis  
Spes ingens, columenque civitatis.  
Iam vexilla, agite, obviam explicate:  
Vos primum Domina appetit videre  
Bonos, innocuos, pios, pusillos,  
Ipsa quos avet educare caelo,  
Rectis moribus et pudore dignos.  
Curram ne adspicitis novum, rubentem?  
Sancta adest Agape: invocate sanctam,  
Nulla vox sileat: venit magistra  
Virtutis, venit optima educatrix,  
Quae totam regat ut parens juventam.  
Grandaevos meminisse vos juvabit,  
Pacem quod Dominae advenae precati  
Cohors dixeritis prior salutem.

Currus autem ad aedes Praepositi constitit, qui tantam  
Hospitam venerabundus in domum suam recepit, et in aula  
locavit, arca mensae illustri imposita, supra quam insulae  
purpureae ab alto pendebant, et cereis ante eam accensis,  
qui in noctem collucerent, interea quum aera de turri re-  
boantia populum admonuissent, civibus undique ad visendam  
Martyrem confluentibus patuit accessus, eoque frequentes  
postero quoque die semel multi atque iterum advenere.

Die eodem sub noctem Brixia adfuit Ioannes Nanius Epi-



( XVIII )

scopus, quem Praepositus hospitio accepit. (13) is porro, quum jam populus expleta desiderii sui expectatione defluisset, in aulam ipse quoque descendit, ut arcae signa recognosceret: quae ubi omnia integra et intacta deprehendit, Martyrem flexis genibus supplicans invocavit, uti populo Clarense et sibi propitia foret. tum jejunium ut perendie esset, indixit. die autem XIII. Kal. Jan. postquam ad vesperrum Clerus omnis ad eum convenisset, ac preces idem sollemnes incolasset, arca clausa est, pompa instituta, ac per Praepositum Patresque Canonicos fulcro supposito, ad aedem Rochianam in suburbium delata est, Episcopo prosequente et populo frequentissimo comitante, quum viae jam lucernarum multitudine collucerent. illic detecta rursum arca est, et Pervigilium ita coepit iu crastinum, ut hora quidem prima Vespertini psalmi Episcopo praecunte decantati sint: tum Matutinos Clerus universus prosequutus sit. reliquum noctis spatium vigilarunt sodales Albati, et qui his succedere Atrati, demum Russati, donec illucesceret, eaque aedes perpetuo cantu personavit. quarum vigiliarum memoria ibidem postea saxo consignata est:

XIIII • KAL • FEBR •  
AN • M • DCC • LXXXVI •  
HEIC • OB • TRANSLATIONEM  
BEATISSIMAE • AGAPES  
PERVIGILIUM • ACTVM • EST

---

(13) *decessit vir hic summus x • Kal • Novembres an.  
m • dccc • llii • multis clarus virtutibus, constantia  
in primis, qua res adversas magno animo pertulit.*

( XIX )

ab aurora ingens populi multitudo undique adfluxit, quae usque ad horam Translationis supplicationem illam fecit celebratiorem. tot inter adfuit et muliercula ex agro, quae domi infantem filium coecutientem ex febris modo reliquerat. haec vero quum magnum animo dolorem coepisset, puerum ibi sanctae Martyri enixe commendavit: mox domum reversa eum incolumem reperit. itaque facti hujus caussa votum in hypogeo prostat.

MARTYRI • SANCTAE • SALVTIFERAE

AGAPE • ADVENAE

SACRVM

EX • VOTO

ZANE • PVER • QVALE • ADMISTI • NEC • BINVLE • CRIMEN

FEBRIS • VTRVMQVE • TIBI • LV MEN • VT • ERIPERET

NIL • EGO • ET • INSONTES • NIL • PECCAVERE • PARENTES

QVAESITVM • AT • SANCTAE • SIC • DECVS • EST • AGAPE

NAMQVE • SVBVRBAŃA • MATER • DVM • SVPPPLICAT • AEDE

ILLA • MEIS • TENEBRAS • DISPVLIT • EX • OCVLIS

Hactenus ea, quae nosse intererat, quicumque narrationem hanc nostram lecturi sint, quam de Agapeis sive de Festis sanctissimae Martyris instituturi sumus

## DE FESTO TRANSLATIONIS

1. **D**ies xii. Kal. Febr. qui jamdiu a nobis anniversaria memoria et communi studio quotannis colitur, primum celebratus est anno M. DCC. LXXXVI. initio ejus a vespero diei praecedentis ducto: hora enim tertia post meridiem incobata Translatio est sacri Corporis ab aede Rochiana in Basilicam: et pompa hoc ordine instituta processit. primi procerum argenteis scipionibus subnixi tanquam Designatores praebant, qui incessum statumque moderarentur: pone quos Magistri doctrinae Christianae tradendae gradiebantur cum insignibus suis, et cereum quisque accensum praeferebat. eodem modo succedebant Sodales Russati, hosque Atrati consequebantur, Albati demum primum agmen clauderant. proximi jam sub Phonasco ibant tibicines omnis generis, quorum concentu omnium aures mulcebantur, nisi quod fragor identidem audiebatur tympanorum. magna subinde apparuit caterva puerorum, qui Caelestium habitu incedebant, specie atque ipso amictu oculos spectantium capientes. inde illa, quorundam facete dicta,

Num claro aligerum cohors Olympo  
Isthaec, quae patulis refulget alis,  
Et Ostro nitet, insitaque gemma,  
Huc nisu celeri advolavit ad nos?  
Nae venere citi, Advenae libenter  
Plaudentes Agape: hospitemque gaudent  
Nobis perpetuam fore atque civem.  
Nam norunt sociam polo receptam  
Caelestes Agapen, amantque cuncti,

Ex quo sidereas adivit arces,

Parto et pulcrior adstitit triumpho.

Enimvero progressi protinus sub labaro viri religiosissimi Franciscales Patres, tum Clerus universus, Canonici nempe Mariales et Collegium Faustinianum, ingensque numerus Sacerdotum advenarum, quem Archipresbyteri etiam e vicinia quatuordecim auxere. post hos Diaconi demum se obtulere rubras induti Dalmaticas, et odoratas faces praeferentes: ministri item octo sollemnibus penulis amplissimisque spectabiles. ipsum vero sanctae Martyris Corpus inter ardentes faces sub ingenti tentorio auratisque velis insigni efferebatur, Praeposito senioribusque Canonicis succollantibus, quos sequebatur Episcopus, particulam e Reliquiis Martyris in theca argentea praegrandi portans, ministris duobus latera tegentibus. ( 1 ) postremi Magistratus erant et Decuriones, turma quoque Equitum Venetorum et plebs universa.

II. Viam autem ab aede Rochiana ad Basilicam cives incolaeque proximi certatim ornant totam, niveisque velis protexerant; milites longo ordine utrinque spectatores cohibebant: tormentorum bellicorum tonitru ab arce audiebatur frequens, aeraque turrium pulsata undique reboabant. post horam ventum est ad Basilicam, quo maturius matronae convenerant, et longa serie bipartito perstabant, faces accensas gestantes, ut tantam Hospitem laetae susciperent, sibi et domui suae propitiam haberent. in medio autem templo stetit paullisper arca, dum vetera Martyrum Lipsana,

---

( 1 ) *hi fuere Iosephus Bellonius Archipresbyter templi maximi Brixiani, et Angelus Faglia Comes, Abbas Pontevicensis, qui Ecclesiae nostrae perdiu Praepositus fuerat.*



quae in altari ad laevam ingredientium quiescunt, ex improviso detegerentur, et Agapen advenam quodammodo salutarerent. subinde usque ad aream templi supremam ultra altare maximum sublata est, ac supra subselliarium sublimi loco proposita, ubi aedicula exstructa fuerat auro argentoque fulgens, et faces circum plurimae collucebant: quo utique spectaculo nihil jucundius populo universo esse potuit. matronae vero post supplicationem, quos secum ipsae adtulerant cereos, honori Martyris donum dedere. at post haec Episcopus, oblato de more thymiamate, vespertinos psalmos de throno suo incohavit, quos lectissimi musicorum miro concentu decantavere, populo ad occasum solis adstante.

III. Postero die, qui Feria quinta fuit, clara item tempestate, ut posses dicere, cum populi vultu diem convenisse, vix valvae templi apertae fuerant, quum frequentissima praeter municipales ex omni pago plebs adesse visa, multaque pietatis publicae indicia apparuere. in primis ad Sacerdotum tribunalia, qui non anteverterant, plerique accessere, ut labes animi rite expiarent: ceteri, dum sacra fierent, flexis genibus Deo supplicabant, nec ante quisquam discedebat, quam opem Martyris enixe implorasset, uti se suasque res caelesti patrocinio tueretur. a solis ortu adfuit Episcopus, ut ipse quoque sacrum ad altare maximum faceret. jamque Sodalitates in templum venerant sanctae Synaxeos causa: ubi sodales ante mensas bifariam in longum productas, quantum Basilica porrigitur, summa religione procubuerant, divinum donum expectantes: quos Episcopus de ipso sacrificio omnes manu sua pavit: miuistris ejus subinde singulos nomismate sacro donantibus, in quo Martyris effigies eminebat. reliqui e populo in cella Eucharistica Synaxin peregere, perpetuo ultra meridicm accessu, indulgentia enim Pii VI. datum cui-

que noverant , ut eo pacto , admissorum poena omni deleta , domum exhilarati redirent.

III. Interea sacrum sollemne inchoatum est Episcopo adstante , magnusque musicorum concentus et fidium , tibia-rum , tympanorum concors sonus populum tenuit. sed pro-lato Evangelio silentium factum , Praepositusque e pegmato concionem adloquutus est ea oratione , quam deinde Andre-ius Canonicus edendam curavit. (2) sacro demum absoluto , haud tamen templum vel a meridie supplicantibus caruit ; qui Martyrem sedulo contemplantes mirifice ad pietatem excitabantur. at Episcopo sociisque in Praepositi domum ad prandium regressis , duodecim e grege egenorum oblati sunt , qui jam mensae accumbeutes laute epulabantur , primoribus Procerum ministrantibus in aula ipsa , in qua Corpus Martyris requieverat : uti ne , ubi Agape fuerat , Agape Christiana dees-set. (3) quam in rem epigramma conditum est hujusmodi :

Prima ubi te votis, Agape, suscepit ovariantem

Caelesti dives pignore facta Domus,

Bissen plebe ad mensam de paupere laute

Accepti heic hilares accubere sepes,

Quippe tuum admonuit nomen nos Hospitis, haud fas

Posthabita hunc Agape praeteriisse diem.

Hora vero secunda post meridiem Clerus omnis praeeunte Episcopo ad psalmos vespertinos rediit in Basilicam: quos musicorum chorus multiplici varietate cecinit. sollemnibus demum precibus persolutis , Episcopus tantae celebritatis laetitia gaudiumque praesferens , quum Clero populoque

---

(2) *Brixiae eodem anno.*

(3) *V. Murat. in anecd. Graec. Disquis. II. de Agapis sublatiis,*

bene precatus esset, Brixiam versus discessit, Praepositumque vice sua fungi jussit. enimvero quum jam advesperasceret, arca Martyris demissa, rursum instituta pompa est, ut ad paratam sedem sepulcrumque deduceretur. idem autem fuit pompae ordo, qui pridie fuerat, nisi quod arcam quatuor Canonici portabant, Praepositus cum ministris sequebatur. itum est a porta Basilicae dextrorsum, inde in viam latam, ac in Hypogeum tandem descensum est, ubi omnia floribus ac luminibus renidebant. quum ad altare pervenisset arca, in latus ejus sinistrum deflexa, sub ipsum denique, animis omnium interea suspensis, introducta est, et ostium clausum. quibus peractis gratiae sollemni ritu Deo actae, laetitiaeque publicae signa ex arce prodita atque turri maxima. plerique vero e populo non ante digressi, quam parvulam Martyris thecam osculati essent. ipsius porro Translationis historiam paucis designat Inscriptio ad dexteram altaris insculpta, cui et vetus Martyris epitaphium subjectum est.

XII • KAL • FEBR • AN • M • DCC • LXXXVI

RELIQUIAE • D • N • AGAPES

QVAE • ROMA • RECEPTAE

POMPA • PRIDEM • EX • AEDE • ROCHIANA

IN • TEMPLVM • MAXIMVM • DVCTA

IOANNE • NANIO • PONTIFICE • N • PROSEQUENTE

ET • PRAEPOSITO • PATRIBVSQ • CANONICIS • SVCCOLLANTIBVS

RITE • TRANSLATAE • FVERANT

ACTIS • IN • VESPERAM • SOLLFMNIBVS • SVB • ALTARI • CONDITAE • SVNT

LAPIS • IPSE • CVM • INSCRIPTIONE

QVI • LOCVLVM • MARTYRIS • IN • HYPOGEO • CALLISTI • PROTEXERAT

MVRO • INFRA • INCLVSVS • EST (\*)

v. Biduo sequenti instauratum in Hypogeo festum, multis mortalibus e vicinia convenientibus, ut opem sanctae Agapae implorarent. Sacerdotes quoque submissi, nec domestici solum, sed etiam externi, qui ea de causa supra Martyris sepulcrum utroque die sacrificium facerent. nec vanae preces aut irrita ea vota fuere. mutata uimirum voluntate ad bonam frugem rediere non pauci: tum, quod orator pridie sperare se dixerat, patrocínio ab Agape Civitatis nostrae suscepto, nonnulli etiam, qui transversum libidine acti, sociam tori nulla lege sibi copularant, seque legitimos conjuges simulaverant, probra sua detestati sunt, et ex auctoritate Ecclesiae nuptias sceleris societate conjunctas matrimonii dignitate sacraverunt. atque hos quidem conjuges novos cives ignoravere: sed factum versibus etiam testatum accepimus.

Quos dudum nullo conjunctos foedere turpem

Impulerat vitam vivere coecus amor:

Adveniens Agape iurepuit, sanctumque pudorem

Largita, ex voto praebeuit auxilium;

Nam scelere abluto venere ad sancta, deditque

Dius Amor casto vivere conjugio.

Fausta item quaedam atque mirifica proxime accessere, quae vim Martyris favoremque portenderent. nam et alii quidam priorum exempla sequuti animos ad religionem pietatemque revocarunt, qui antea vitiis irretiti ad interitum abripiebantur. id nempe Ode designat, quam subijcimus.

Ad nos quae pede dextero

Sanatum virum vulnera sontium

Advenit, bona ceu parens,

Cives dulcisonis plaudere vocibus

Quid cessant? Agape inclita



Romana est Agape , quae potis invido  
Servare abs Erebo , malas

Nil Orci metuens insidias trucis.

Ipsa est , quae populi cict

Plorantis lacrimas , sensaque dat pia ,

Qucis iras bene Numinis

Vel sero sapiens molliat asperas.

Totum muneris hoc sui est ,

Quod livor procul his finibus exsulat ,

Infauftique cupidines ,

Et quidquid Stygiis e tenebris subit :

Vel quod iustitiae soror

Incorrupta fides grataque veritas

Fausto jam pede redditae

Nostras praesidio tegi amant domos.

Quid , quod Guiditiolis , ubi sacrum Agapes Corpns , quum Mantua Brixiam deferretur , nocte constiterat , litterae postea ad nos adlatae sunt , in quibus vir summus (4) Archipresbyter testabatur , ibidem nequam hominem ductorem ordinum , quum ex gravi morbo in cubiculo eodem decumberet , in quo sancta Agape locata fuerat , piissimis viris hospitibus pro eo Martyrem toto animo implorantibus , repente antea vitae pertaesum mutasse consilium , erroresque veteres multis cum lacrimis detestatum , poposcisse Ecclesiae pacem , nec multo post tranquilla morte animam exhalasse . qua de re haec tum scripta meminimus.

---

(4) is est Fortun. Antonius Forestus , pietate et doctrina insignis , cujus litterae in Hypogei tabulario adservantur , scriptae anno M . DCCC . 1 .

( XXVII )

Magna ad Clarenses Agape quum tenderet hospes,

Hic stetit, hic diæ præmia liquit opis.

Namque ibi quum subita deprensus morte jaceret

Celta amens, spreta religione ferox;

Virtutem hospitii sensit, vitamque perosus

Antiquam, sacris redditur obsequiis:

Nempe illi praesens Agape cor protinus anxio

Exorata, animum restituitque Deo.

VI. Atque haec quidem beneficia Martyris erga nos maxima et pulcherrima fuisse, quamquam penitus abdita in animis singulorum, nec sub oculis posita. haec tamen multis aliis, quae aperta cuique atque perspicua acciderunt, saepe cumulavit atque auxit. primum enim aegris solatia non defuisse, quicumque auxilium ejus petierunt. votum sanatae puellae legitur in Hypogeo hujusmodi.

MARTYRI • SANCTAE • SALVIFERAE

AGAPE • INCOLAE

SACRYM

EX • VOTO

VICVS • VBI • IN • LAEVVM • DECLINAT • PROXIMVS • AVSTRVM

QVAEREBAT • MEDICAS • AEGRA • PVELLA • MANVS

ANNA • OLLI • NOMEN • MISERE • CVI • TRISTE • TVENTI

SQVALOR • VBIQVE • ADERAT • FLAVVS • VBIQVE • COLOR

IMPLORATA • AGAPE • VOTA • AVDII • HEICQVE • VIDENDI

REDDITA • VIS • SVBITO • EST • PARTA • SALVS • REDVCI

Votivae insuper tabellae satis declarant, quam saepe Martyr sancta poscenti opem adfuerit. id apprime ex hendecasyllabis subjectis edisces.

Exorata Agape quid alma possit,

O cives quot adestis hospitere,

( XXVIII )

Suspensis paries vel hic tabellis  
Monstrabit, titulique condocerunt.  
Abjecto en modo scipione claudus  
Discessit saliens: puer recepto  
Risit lumine laetus, ad parentes  
Mox alter scabie exilit relictæ.  
Hic liber capitis dolore gandet,  
Angores animi ille deposivit.  
Insanos pepulit puella amores,  
Vafri edocta dolum malum institoris.  
At matrona virum beata frugi  
Recepit, sterilisque sponsa prolem.  
Qui perget precibus rogare sanctis  
Haud unquam periisse vota noscet.

vii. Equis igitur mirari jure possit, summum jam esse  
Clarensium studium erga Martyrem, quæ tam faustis omni-  
nibus ad nos venerit, et tanto eadem prodigiorum apparatu  
de omnibus benemereri non desinat? propterea ipse Trans-  
lationis ejus dies festus, qui primum magnam omnibus læ-  
titiæ adtulerit, ita quotannis celebratur, ut ante eum diem  
per triduum, ad laudes ejus debitosque honores convenia-  
mus, Hypogeo quaquaversum collucente, sed altari potissi-  
mum atque sepulcro, quæ onini ornamento exulta resplen-  
dent, donaria etiam per eos dies prostant, de quibus carmen  
exaratum est, quod subjicimus.

Tres tibi pulcro, Agape, suspendimus ordine lychnos,  
Quisque tibi ut triplici fulgeat igne sacer:  
Qui medius splendet, partam olim sanguine palmam  
Indicat, et meritum Martyris obsequium.  
Alter at adventum memorat faustumque triumphum,  
Advena quum nostro es sera recepta solo.

Tertius optatae testis quod reddita sedi

Incola nos prece, nos auxilioque juvas.

Factum quoque est pietate multorum et beneficentia suffragante, ut de Hypogeo in ipsa fronte ornando cogitaretur, quae jamdiu Agapen refert Deo pro nobis supplicantem: (5) cui subscriptum est:

GAVDE • O • CLARIUM • EXORANTE • AGAPE • TE • PROTEGIT • DEVS  
Subinde consilium etiam captum de aditu a via publica altero aperiendo, qui jam auris salubribus et populo patet perconimode. versus autem inscripti sunt duo:

Impius hinc procul esto: Pii succedite: sacrum

Hac iter est Agapes Martyris ad tumulum.

Intus in Hypogeo extremo contra altare subselliarium eminet, quo se Clerus conferre solet ad sollemnes psalmos, organumque adstructum est, ne deesset quod cantus numerosque moderaretur. sepulcrum autem Martyris, quod sub altaris marmorei mensa porrectum spectatur, habet ad latera exterius urnulas ex aere binas inauratas cum titulo,

AVE • AGAPE • MARTYR •

SALVS • POPVLI • CLARENSIS



At in proximo totius Cellae interioris novo cultu aucta dignitas est, camera ejus opere plastico variata, pilisque peregrinorum marmorum specie perfusis: quae vir optimus Paullus Bedoschus Canonicus, qui nunc Hypogei praefectura splendide fungitur, diligentissime perficienda curavit. tum sub idem ferme tempus eodem auctore septum quoque marmoreum additum videmus, quo tria inter pilas latera ele-

---

(5) *opus est praeclarum Iosephi Teosae nostratis.*

gantissime clauduntur, aptusque ad supplicandum locus accedentibus exhibetur. nec minus sperandum est fore in posterum, ut major etiam sanctae Agape honor tanti Praefecti studio habeatur, et loco ipsi fama, celebritas, reverentia ad crescat.

## CAPUT II.

## DE FESTO DEPOSITIONIS

1. **D**iem Depositionis eum appellabant majores nostri, quo mortuum in sepulcro condidissent. fuit autem sanctae Martyris Agapae Depositio xvii. Kal. Septembres, qui nobis utique sacer semperque honoratus futurus est. norunt hunc et finitimi populi, qui eodem die Martyrem veneratum adveniunt, norunt et longinqui, apud quos virtus ejus et beneficentia celebratur. quanto magis noster in eam animus pristinus perennitatem habere debet, quibus ipsa praestanti in nos liberalitate ac prope quotidianis beneficiis devincta est? quanta vero laetitiae pietatisque significatione instituta jamdiu sollemnia adhuc servantur, Ode satis declarat, quam hic leges.

Dum clara prodit nomine lux tuo,  
Descende caelo, atque huc, Agape, veni  
Optata jamdudum, novosque  
Vna potis recreare cives.

Sic Thecla caros ad Cilicas super (1)  
Venisse curru dicitur igneo

---

(1) *V. Basil. Seleuc. Lib. II. c. 10.*

Sublimis, et fulgente vultu

Per tenues volitasse nubes.

Iam pagus omnis cum bove, jam vacat

Per prata circum ludere amans pecus,

Festumque civis villicusque

Laetus agit reboante caelo.

Ast ara splendet pulcrrior, et tibi

Ornata gratis fumat odoribus:

Lychnisque rursum laureatis

Et facibus radiata lucet.

An forte supplex te populus magis

Delectat? ultro te genibus minor,

Ceu natus ereptum parentem

Accipiet reducemve matrem.

Ad te supinas ipse feret manus,

Sperare certus quidquid opis petat:

Almam vocabit, nec severam

Te Domina metuet repulsam.

Ruris colonus sollicita prece

Te pronus ambit, te juvenum cohors,

Quicumque laudem se labore

Seu studiis mernisse gaudet.

Te novit altum qui bibit Abduam,

Ollique pernix te canit accola,

Mincique quotquot proximasque

Eridani coluere ripas.

Tu spem reducas mentibus anxiis,

Tu robur addas dura ferentibus:

Adsisque dives perroganti

Suppetias tribuisse plebi.

Serves futuris munera saeculis

Quae Roma misit, quaeque sacrum tibi  
 Claudit sepulcrum, ne potenti  
 Praesidio miseri carerent.

Serves tuorum sancta clientium  
 Patrona mores et sobolem et domos,  
 Auctura caelestes honores  
 Quois superas reserabis arces.

Huic diei supplicatio non praecedit, quia sollemnia subsequitur Mariae Virginis sideribus receptae, cujus honori in aede ejus proxima conventus magno pietatis studio per triduum agitur. sed pro triduo septem qui consequuntur dies a populo statis precibus quotidie dicatis ornantur, celebrantur. in ipso autem die festo, qui omnibus caeremoniis et omni cultu peragitur, Synaxis est confluentium, et poenae omnis remissio iis, qui rite expiati supplicatum accesserint. sacrum vero ab anno M. DCCC. I. nomine Agapes Martyris fit ex indulgentia, ut diximus, Pii VII. P. M. quod poëta versibus prosequutus est.

Quum supplex, Agape, tuam sacerdos  
 Ad aram faceret, (suprema namque  
 Nondum jura dabant) tuum ciere  
 Nomen haud poterat tuasque laudes.  
 At quae grandia mox loquuta fama est  
 De te, Romuleas tulitque ad aures;  
 Cui non grata forent? Senatus ipse  
 Augusto placide obsequutus ore,  
 Poscentes dedit invocare sanctam,  
 Bis festum celebrare, bis honore  
 Sollemni colere, ut tuo beati  
 Simus praesidio tuoque amore.

( XXXIII )

II. Iam sacra super sepulcrum Martyris quum ab aurora fiant ad meridiem, perpetua populi frequentia Hypogeum redundat; sed maxime quum sollemne sacrum decantatis ab omni Clero psalmis perfici coeperit. a meridie rursum ex ipsis agris adveniunt coloni Agapen suam visuri: nam sepulcrum Martyris patet ad occasum usque solis: redeunt urbani etiam vel votî compotes, ut gratias agant, vel opis indigentes, ut sibi propitiâ demerantur. hospites quoque pictura admonet secus viam, festo apparatu insignis, item serici limbi fluitantes, ut in Hypogeum descendere velint: et habent etiam plerique imagines ex aere effictas, aut libellum, unde quisque gemini dies festi facile ediscat.



## DE FESTIS CONCEPTIVIS

1. **P**rimum quidem mense Maio, quum in Basilica nostra Lipsanorum sacrorum anniversaria sollemnia die Dominico altero celebrantur, eo die Corpus quoque sanctissimæ Martyris revelari mos est. iterumque mense Iulio quum festum in Hypogeo peragitur Redemptoris divini, die scilicet Dominico tertio, a meridie sepulcrum patet: et utroque die Agapen usitatis supplicationibus honoramus. quidam etiam quotannis quas libet ferias sextas tres continentes pro studio suo dicare ei solent, easque peculiari obsequio venerantur, sacramentis ad animi expiationem rite susceptis.

II. Sed publico nomine quandoque dies ad supplicandum designatus est ob calamitatem aliquam ingruentem. id primo factum, quum Gallorum exercitus in Italiam infusus ad Ollium pervenisset: quod contigit VI. Kal. Iunias anno M. DCC. LXXXVI. votum publice tum susceptum, de quo epigramma habes huiusmodi:

Italiam Gallus peteret dum turbidus armis,

Et nostras pauper quaereret exuvias;

Ollius obstabat medius sine milite, pronum

Inque agros lato ponte patebat iter.

Suscipimus sero moesti sub vespere vota:

Mane, Agape, laeti reddimus ipsa tibi;

Nec mora, dextrorsum flectit se exercitus omnis,

Hic et tutus ager, tuta fuitque domus.

Quum vero bellum rursus anno M. DCCC. timeretur, iterum Martyri supplicatum est, et voto suscepto patrocinium imploratum.

Dum discordia perfidos tumultus  
 Bellum et classica nunciant sonora,  
 Hos inter fremitus gravesque motus  
 O nostros, Agape, tuere fines,  
 Huc quae Romulea volens ab urbe  
 Servatrix ades, incolaeque more  
 Iam civis studiosa, jam Patrona  
 Dici et esse libens amas clientum.  
 Pax si manserit heic, tuamque dextram  
 Hostis si metuet; sacro heic peracto  
 Laudes laeta cohors tuas canemus:  
 Latique auxilii tabella testis  
 Dicet hospitibusque posterisque  
 Tua rursus ope Clarum stetisse.

nī. At multo frequentius pro aegrorum salute Clerus ro-  
 gatus convenit ad sacrum sollemne, nec sine populi con-  
 fluentis sollicitudine de civium suorum valetudine ex ani-  
 mo laborantis. compertum quippe est, benignam Marty-  
 rem precibus nostris adnuere, praestitemque esse: quod ni-  
 mirum aut convaluerint, pro quibus ad ejus sepulcrum sa-  
 cro facto supplicatum fuerit, aut certe aegrotantes tempus  
 sibi mirum in modum impetrarint, quo animi labes ablu-  
 rent, et graviiori morbo liberarentur.

Quod reliquum est, fateri jam omnes debemus, divino  
 plane munere sanctae Martyris Corpus ad nos pervenisse,  
 ut in tutela ejus quiesceremus, in eaque tamquam Patrona  
 pientissima paratum nobis praesidium adversus omne ho-  
 stium genus quotidie experiremur.

Haec tibi sint, Agape, nostri pia munera amoris,

De te perpetuo ut fama loquatur anus:

( XXXVI )

Nec de te solum quot adhuc benefacta fuere,  
Sed quae nostri etiam grata animi officia :  
Quo nempe exsuvias cultu, quo nomen honore  
Tota tuum supplex Patria prosequitur.  
At studii haec nostri fac sit mansura voluntas,  
Vt par in populo Relligionis erit.  
Hanc sequimur, tibi nos dum plaudimus, hancque sequetur  
Quae sapiet post nos ultima posteritas.

## DE BENEFICIIS IMPETRATIS

Vtinam, ut benigne adnuit Agape opem ejus implorantibus, sic et iidem omnes accepti beneficii tabellam testem exstare voluissent! multo plura caelestis largitatis monumenta haberemus, sed his tamen deficientibus non patiar latere, quae ad aures meas pervenerunt. ea sunt hujusmodi.

*Aeger solatio recreatus*


Insomnis longa nuper quum nocte jacerem,  
 Torreretque ambos dira podagra pedes:  
 Supplicio in tanto mihi quae solamen adesset,  
 Imploravi Agapen: ter fuit auxilio:  
 Actutum blando nam sparsit membra sopore,  
 Perfuditque artus rore benigna suo.




AVLVM • IN • MILITIAM  
 AB • AGRO • ABREPTVM  
 AGAPE • ORANTEM • AVDIVIT  
 LIBERVVM • REMISIT • DOMVM

( XXXVIII )

ΑΓΑΠΗ · ΜΑΡΤΥΡΙ  
ΕΤΝΙΚΗ  
ΜΝΗΜΗΣ · ΧΑΡΙΝ  
ΟΤΙ · ΔΙ · ΑΥΤΗΣ · ΖΗ



FLAGRABAM · AMENTIA  
INFLAMMATVS · LIBIDINE · FEREBAR  
IN · VETITVM  
TVO · DE · MVNERE · AGAPE · SANCTA  
ODIO · IAM · EST · QVOD · AMABAM



NVPTIAS · COGITABAM  
VIR · ERAT · IN · PROMPTV  
TV · MIHI  
ADPVISTI · AGAPE · FACEM · PRAEFERENS  
VIRGINITAS · MIHI  
IAM · IN · DELICIAS · ERIT

( XXXIX )

MALVS • AH • PEREAT • PYDOR  
QVI • ME • PERDITVM • IBAT  
TE • AVSPICE • TE • ADIVTRICE  
AGAPE • MARTYR  
LABEM • ANIMI • EXPIAVI  
VICTORIA • LAETVS

\*\*\*\*\*

AGAPE • EXORANTE  
DIVINITVS • DATVM • LAELIAE • FAVSTI  
NE • IN • AQVIS • PERIRET  
CVIVS • EFFIGIES • HEIC • POSITA • EST  
VT • ESSET • AD • POSTEROS • MIRACVLI • EIVS  
MONIMENTVM

\*\*\*\*\*

DONARIVM • ARRVNTIARVM  
QVOD • AGAPE • PROPITIA • DOMVS • TOTA  
EXTINCTIS • ODIIS  
TRANQVILLITATE • VTATVR

( XL )

SALVIA • MATER  
INFANTEM • PVERVM • SERPENTE • VLGERE  
LANGVENTEM  
ANTE • SEPVLCRVM • AGAPES • MART •  
SVPPLEX • RECEPIT • INCOLVMEM



SEPTIMIVS • PATRIA • EXTORRIS  
IN • EXSILIO • CONSENESCEBAM  
IMPLORATA • AGAPE  
DOMVM  
POSTLIMINIO • REVISI



FLAVIA • MATER  
CAMILLO • FILIO • INCOLVM  
AB • HESPERIA • VLTIMA • RECEPTO  
AGAPE • MARTYRI  
GRATIAS

( XLI )

QVOD • NEC • STERILEM • RVBIGINEM • SEGES  
NEC • FOECVND A • VITIS • PESTILENTEM • AFRICVM  
SENSE RIT  
COLONI • MONTICELLE NSES  
AGAPE • MERENTI  
DONVM • DEDERE



ICTV • ARBORIS • PROPE • FVNERATVS  
FILIIS • NOMEN • TVVM • AGAPE • SANCTA  
INCLAMANTIBVS • REVIXI



MAXIMILLVS • PVER  
MODO • VALGVS • DISTORTIS • CRVRIBVS  
A • SEPVLCRO • AGAPES • MART •  
RECTIS • PEDIBVS • IN • AMPLEXVM  
MATRIS • VENIT



( XLII )

DESIDERATVM • IN • PROELIO • VIRVM  
ANTE • SEPVLCRVM • AGAPES • MART •  
DEFLEBAT • BERENICE • MVLTIS • LACRIMIS  
DOMVM • REVERSA  
VIRVM • COMMEATV • IMPETRATO  
INVENIT • REDVCEM



ELISA • MOERENS  
OB • NVTRICVM • ALTERAM • FVRVLENTAM  
IMPLORAVIT • OPEM • AGAPES  
AMBAS • PERENDIE • SORORIANTES • SENSIT



MAXILLA • VTRAQVE • DOLENTE  
FRENDEBAM • DENTIBVS • GEMENS  
NEC • LACRIMIS • TEMPERABAM  
ACCESSI • OSCVLATVM • DENTEM • AGAPES • N:  
ILICO • STETIT • DOLOR

( XLIII )

INSTABAT • MIHI • MORS  
AT • VOX • FAVCIIVS • HAESERAT  
ADMISSA • RITE • ACCVSARE • NON • POTERAM  
INVOCATA • AGAPE • BIS • ADFVIT  
VOCEM • REDDIDIT • VITAM • SERVAVIT

XXXXXXXXXXXXXXXXXXXXXXXXXXXXXXXXXXXX

ANNO • M • DCCC • XIII •  
III • KAL • NOV •  
VOTIS • PVRLICE • SVSCEPTIS  
AGAPE • IMPLORATA • PLVVIAS • SVSPENDIT  
ET • A • SVPPPLICATIONE • PRAESENS  
AGROS • AQVIS • OBRVTOS • OPPLETOSQVE  
PATEFACTO • SOLE • RECREAVIT

XXXXXXXXXXXXXXXXXXXXXXXXXXXXXXXXXXXX

III • KAL • APR •  
ANNO • M • DCCC • XV •  
SVPPPLICATIONE • INDICTA  
ET • SACRO • AD • SEPVLCRVM • AGAPES • FACTO  
VTI • CVSTODI • SVO  
PAVLLO • BEDOSCHO • CVRIONVM • PRIMO  
DE • VITA • OB • MORBI • VIM • PERICLITANTI  
PROPITIA • ADESSET  
CIVIVM • VOTA • AVDIIT  
ET • VALETVDINE • REDDITA • PRAECLARVM  
ANTISTITEM • PATRIAE • REDONAVIT

( XLIV )

Haec satis, ut de beneficentia Martyris nostrae erga nos fama transeat ad posteros: qui experiri ipsi etiam facile poterunt, quanta sit apud Deum gratia, siquidem eam pari atque nos religione et observantia colendam sibi celebrandamque existimarint.

FINIS.

**MIXAHAEIA**  
**SIVE**  
**DIES FESTI**  
**PRINCIPIS ANGELORVM**  
**APVD CLARENSES**

Quae modo jam senior confecta aetate parabam  
Sera tuo, Michaël, compta ministerio;  
Exiguo quamquam censu, nec digna magistro,  
Accipe quae toto dat tibi mens animo:  
Spero equidem, nec vana fides, potiora rependes  
Caelesti veniens quae dabis auxilio.

/

( XLVII )

*PRINCIPI CAELESTIVM*

*MICHAËLI SANCTISSIMO MAXIMO*

*TUTORI NOMINIS CHRISTIANI*

*PERPETVO INVICTO*

*VOTA CLIENTIVM NOVORVM.*

*H*onoris tui solium, alme Michaël, apud Caelestes admirati, adeo dignitatis tuae splendore perstringimur, istam ut majestatem mens animi perferre vix possit. quia tamen eximiam decoris tui speciem suavitate quadam adspergis, neque supplicantium cuiquam admissionis spem eripis; liceat nobis adspirare quo vocas, propitiumque te nobis addita alacritas reddat, cujus in tutela adquievimus. tu nimirum auctor mortalibus es laeti-

tiae omnis et faustitatis, quo scilicet magistro jamdiu didicimus, ne nobis quidem iter illud ad caelum adnitentibus fore interclusum: paratas imo cuique sedes esse, ubi aevo beatissimo perfruemur, extorribus inde teterrimis hostibus, quos ipse triumphator invictus profligaveris. itaque hoc primum postulare audemus, uti volens libensque vota nostra et gratulationes et studia accipias cultorum tuorum. nam unus maxime et imploratas preces benignus audis, et gratulantium de victoriis tuis officia probas, et nominis tui studiosos gratiae voluntatis significatione prosequeris. utinam vero quae tua erga homines pietas est, eandem omnes quae par est fide et virtute imitemur. eaque potissimum in oculis habere nos juvet, quibus sanctimoniam tuam, dignitatem, honores, res gestas perpetua recordatione summoque obsequio complectamur. atque haec profecto tibi nemo non debet; quum beneficia tua piorum consensu et communi religionis nexu conjuncta videantur. sed quum hoc etiam nobis indulgentia tua adtributum sit, ut prae ceteris in cultorum tuorum numero censeamur, studium jam erga te nostrum ejusmodi esse oportet, ut conatus aliorum et recte facta longe superemus.

*quantum enim ex benevolentia tua et liberalitate auxilii nobis et utilitatis accesserit, curae tantundem et laboris et diligentiae a nobis impendendum est, ut grati semper atque beneficiorum memores reperiamur.*

*Et haec quidem in votis sunt, ut quae desiderio ipso jamdiu incohata vides, ea opere aliquando perfecta recognoscas. sed tamen age, caelestis Patrone, qui recta petentibus bonus adnuis, hoc etiam muneris tui fac esse, ut nec memoria tui unquam animo excidat, et virtutum tuarum decora nos specie ipsa semper et splendore delectent. sic constanti amore tuos invenies, idemque efficiēs, ne tua nos amplitudo majestasque deterreat. quin et illud a te facile impetrabimus, ut ne ipsum quidem munusculum rejicias, quod tibi in libello nostro, quaecumque est, unanimes exhibemus. id utique ea mente dedicatum volumus, ut quamdiu in tutela tua nos esse gloriemur, tamdiu praesidium nobis ad salutem nunquam defuturum intelligamus.*

*Quia demum ne eos quidem negligis, quos praeterea in ejusdem nominis societatem nobiscum conspirare percipimus, eos quoque liberalitatis tuae*



( 1 )

velis esse participes : quo et laetitia clientium  
tuorum in dies ad crescat, et obsequentium studia  
sanctissimis religionibus augeantur.

*Dulce est, o Michaël, caro de nomine plures  
Quod duce te sacro jungimur auspicio.  
Augeat et numerum rursus submissa juvenus,  
Quae simul imperio militet alma tuo.  
Hoc juvat : ingentes auctus quum fama loquetur,  
Accepta haec referet munera quisque tibi.*

## DE CELLA MICHAËLIANA CLARENSIVM.

Quum superioribus aetatibus insignia passim monumenta extarent memoriae dicata sanctissimi Principis Angelorum, mirandum plane est defuisse temporibus nostris, qui tantî Ducis dignitatem laudemque veterum exemplo renovarent. et Claris quidem praeter imaginem unam, quae in aede Sancti Archidiaconi Bernardi visitur, vestigium erat aliud nullum, quo magni Michaëlis cultus celebraretur. in ipsa autem urbe Brixia, quam multa et praeclara templa exornant, aedes adhuc Archistrategi desiderabatur, quum eam primus destinavit Episcopus noster pius idem ac sollers, quam veluti arcem esse voluit tutelae paratam defunctorum.

Ceterum Clarensibus datum est, ut anteverterent, insignemque Cellam primi constituerent, quae caelesti huic Patrono sacraretur. praeclari operis potior laus fuit spectabilis viduae, quae locum Cellae optavit via Iacobeae extra pomœrium, ubi aedes eminet sanctae genitrici Dei sacra, quam duo praeterea ex Apostolis tresque alii c sanctis caelitibus adprime illustrant. verum ne manus illico operi ad-moveretur non tam religiosae feminae tîors, quam perver-sorum hominum voluntas obstitit, pecuniam intervertere con-nantium, quae vindici sanctissimo jamdiu debebatur. bien-nio officiosius quam res posceret elapso, res demum in fo-rum deducta est, eoque in iudicio adversarius tandem, praestantissimi adolescentis prudentiam expertus, caussa cecidit.

Post haec mora omni sublata, quum idus essent aprilis anni M. DCCC. XIII. a lapide auspicali initium factum, jactis-

que fundamentis, quum operae nunquam cessassent, intra quintum mensem moles educta, opusque prope perfectum visum est. tholo enim imposito et corona subjecta, pilis quoque additis sex, quae Cellae formam definirent, jam aedificium spectantibus adridebat, at binae itera portae ad latera apertae, simul et fornix anaglyptis ornatus, altare vero e marmore elegans accessit ejusmodi, nihil ut ad speciem deesse vidcretur. sed et tabulae praeterea duae additae marmoreae, quae in aeternam memoriam sanctae atque sacrae essent, altera ut historiam absoluti operis sic referret:

MICHAELI

PRINCIPI • ANGELORVM

INVICTO • MAXIMO

KATHARINE • IOAN • ZANETTI • F •

KATAPANIA

CELLAM • AVGVSTAM

PRIMA • DEDICARI • IVSSIT

CVLTORES

CAELESTIS • PATRONI

AERE • CONLATO

PERFICIVNDAM • CVRAVERE

ANNO • M • DCCC • XIII •

FAVSTO • FELICI

( LIII )

Altera vero, quae supplicationis formulam exhiberet, his verbis:

MACTE

O • DAEMONVM • POTENS

MACTE • O • DVCTOR • ALME

DECEDENTVM

TVAM • QVICVMQVE • SVPPlices

HEIC • OPEM • IMPLORAVÉRINT

TV • MICHAEL • SANCTE

EXORATVS • AVDI

AVDI • ET • MAGIS • POSTVLANTES

VTI • VITAE • IN • EXITV

TE • QVI • TVTOR • ES • FIDELIS

PRAESENTEM • SIBI • SENTIANT

ET • PROPITIVM

Septembri autem mense prope exacto, quum novae Cellae dedicationem permulti urgerent, impedimento esse videbatur eximii operis nondum absoluta delineatio, ipsa nempe Imago summi Principis Angelorum, quam Teosa noster magno studio perfectam exoptabat, quae scilicet ingenii ejus et judicii publici insigne monumentum futura erat. interea quum in promptu esset, atque etiam oblata fuisset effigies altera, quae vicem hujus apte supplere posset, ipse etiam adnuisset indulgentissimus Episcopus noster, ut jam ea dedicatio a Praeposito Clarensium perageretur, pridie kalendas Octobres, qui dies nobis magno semper in honore erit, multis mortalibus undique adfluentibus incohata rite supplicatio est Clero omni adstante, et singula ex ordine peracta, quae sanctissimis ceraemoniis concluduntur. dedicatione absoluta sacrum sollemne indictum coròna ministrorum adstante, et

ab Evangelio pronunciata Laudatio est disertī oratoris : musico etiam concentu aucta celebritas , quae mire populum exhilaravit.

At VIII. idus Majas anni insequentis , quum honori caelestis Patroni sollemnia iterum peragenda essent , auxit populi laetitiam adlata denique effigies Teosiana , quae Cellae nostrae splendorem adtulit singularem. quainobrem insigni hac tabula in sedem suam recepta , eaque rite lustrata omnes operi cives hospitesque plauserunt : ipsumque monumentum religio sacrasse visa est , atque impensius ad cultum animos illexisse. jamtum enim fuit , qui et tantum Lucem una cum caelestium exercitu ad novam festi diei celebritatem versibus invitaret hujusmodi :

Dux sacri Michaël agminis , huc age  
Ad festum propera quem colimus diem :  
Huc tecum rutilis ducito caeliturum  
Sanctos sideribus choros.  
Te namque aligerūm prosequitur libens  
Quovis alma cohors te duce daemonum  
Victrix , quae superis addita sedibus  
Virtutis memor est tuae.  
Gratis ara , vidē? fumat odoribus  
Et multis populus te precibus vocat :  
Implorate fave , nostraque supplicum  
Summo vota refer Deo.  
Heu terret miseros exitus anxii  
Impendens animi , spretaue iudicis  
Majestas , scelерum quem fore vindicem  
Seros religio docet :

Terrent insidiac , quas struit hostium  
 Conjuncta cohors , perdere quæ genus  
 Humanum adgreditur , sedibus et suis

Adscitos pepulisse avet.

Ergo funerea ultima ubi faces  
 Jam lux extulerit , raptus in aethera  
 Fac terris subito spiritus avolet

Caelestem in patriam levis :

Fac prodire chorus gestiat obviam  
 Laetantis populi , caraque civium  
 Invitet propior dextera , quot poli  
 Nunc arces pedibus premunt :

His laudem sociis ut Pater audiat  
 Natusque unigena et temporis inscius  
 Ex utroque fluens Spiritus , omnibus  
 Vnus qui Deus imperat.

Quum autem per eos dies multi quoque e finitimis visendi studio aedem nostram adirent , et tabulam Teosianam plerique omnes commendarent ; fuit tamen qui cetera probans , vultum nihilominus magni Archangeli reprehenderet , quod tanto hoste prostrato irarum in eo indicia nulla emerent , neque de victoria exsultare animus eius videretur . at ille non vidit , eam pictoris mentem fuisse , ut non tam Angeli vim , quam ipsam virtutem ostendcret , eique hoc magis acceptum , Deo tum esse satisfactum : quo nihil certe Angelo jucundius accidere unquam poterat , ut in epigrammate adnotatum animadvertes.

Subridet Michaël devicto interritus hoste :

Nec mirare , olli jam nihil est reliquum .

Scilicet aeternum caelestibus exul ab oris  
Frustra hostis cives increpat aetherios:  
Pax superis parta est, superis victoria cessit,  
Dux facti Michaël praemia prima feret.

Haec demum laus Clarensibus debetur, ab ipso exordio  
ampliatae aedis mira cultorum exarsisse studia, qui Cellam  
Michaëlianam exornare caeperunt, festosque dies sibi nuper  
optati tutoris ac vindicis in honore quotannis haberi volue-  
re. nec defuit, qui pulcherrimum Imaginis exemplum in  
aere effingendum curaret, ut multiplicatis exinde formis ef-  
figiem quisque vel domi habere posset, quae magnum sae-  
pius Archangelum in memoriam revocaret. sed illud in pri-  
mis commendandum est, ex eo die clientes pientissimos jam  
optare sibi ac petere, non modo ut tantum Patronum ubi-  
que propitium habeant, sed etiam ut eundem maxime in  
mortis suae discrimine praesentissimum experiantur: quemad-  
modum versibus quoque nonnulli exposuere:

Quae tibi nunc vario fulget sacra marmore Cella,  
O Michaël, domito dux metuende Erebo:  
Hanc primum mulier pia condidit, hancque clientes  
Dein studio ornantes excoluere tui:  
Ut sibi nimirum praesens, ut civibus idem  
Mortis in ambiguo limine adesse velis.

---

Tartareus quamvis crudelius infremit hostis,  
Nqs ubi in extremum mors rapit interitum;

( LVII )

Quid metuas, Michaël tibi si fortissimus adsit,  
Cui cessere hostes aethere quotquot erant?  
Quem colis, hic vitae columnen, morientis et idem est  
Solator: mortis quippe habet imperium.  
Ipse iter insuetum tibi pandet in avia, teque  
Victorem lateris ducet in astra comes.

CAPUT II.

DE ALTARIBVS AEDIS NOSTRAE PRIORIBVS.

Veterem tabulam, quam altare maximum adhuc exhibet, indoctus auctor sic pinxerat, ut inter Apostolos Philippum et Iacobum Domini nostri Anastasis supra sepulcrum ejus emereret: omnino ut vides mendose; neque enim resurgenti a mortuis Christo Apostolorum quispiam adfuit: ergo ex sancti Caroli Archiepiscopi nostri praescripto (1) commentum illud tandem submotum est, ejusque loco rite inserta vetustae memoriae imago Mariam Virginem referens sideribus receptam, cujus jamdiu dies festus quotannis XVIII. kal. Septembres summa religione celebratur, eo ad sollemnia conveniente Collegio Faustiniano frequentique viciniae coetu. id ipsum titulus indicat, quem in pronao proponi mos est:

DOMINAE • NOSTRAE

SANCTAE • GENETRICI • DEI • MARIAE

SIDERIBVS • RECEPTAE

CYRIA • TERTIA • SACRIS • SOLLEMNIIBVS

OPERATA • DEDICABAT

---

(1) *V. Conc. I. Mediol. an. 1565. apud Hard. T. X. p. 643.*



Phalencios autem simul liceat adscribere , qui ad eum diem pertinent , et Curiae nostrae pietatem praeseferunt ;

Virtutum meritis beata partis ,  
 Et sero mage nobilis triumpho ,  
 Salve o sidereo recepta caelo ,  
 Quae Regis solio locata fulges ,  
 Sanctae virgo eadem parensque prolis ,  
 Et totius amor decusque olympi.  
 Adsunt scilicet hoc die frequentes  
 Si rursum tibi Curiae , pioque  
 Si plaudens reboat choro iuventus ,  
 Da nostri studium placere amoris ,  
 Et justis merita adprobasse votis.  
 Inanis nihil adlicit voluptas ,  
 Insanaeque nihil morantur aerae ,  
 Nec fastus male perdit ambitusque.  
 Vnam te canimus ducem ac magistram ,  
 Vna es , quam dominam vocamus : unī  
 Sacros perpetuo scias honores ,  
 Quibus te colimus. fave ; iuvabit  
 Tui nos meminisse : quippe talem  
 Quis frustra dominam vocavit unquam ?

Eodem vero in altari magnos quoque Apostolos hono-  
 ramus , Philippum nempe Bethesdaeum et Iacobum Adelpho-  
 teum , quorum dies festus kalendis Majis adnexus est (1).  
 eum porro non Cleri tantum conventus , sed Curia etiam

---

(1) *V. post alios Zacariam dissert. de tribus Iacobis a p. 7.*

universa celebratiorem facit, opem singulis patrociniūque religionis pacisque caussa implorantibus, quod versus quoque designant, quos subjiçio :

Relligio in primis cara est, qua vivere caelo  
Discimus, et vanas temnere divitias:  
Virtutis socia est Pax altera; quippe beatum  
Ipsa facit, tristem qui fugit invidiam.  
Custodes sancti, patriae queis maxima cura est,  
Haec date : sat vestra tot bona tuta prece.

Eodem et Inscriptio spectat, quae hoc die ad aedis portam  
prostare solet :

PHILIPPO • BETHSAIDEO • IACOBO • ADELPHOTEO  
MAGNIS • APOSTOLIS  
CAELESTIBVS • PATRONIS • CYRIAE • TERTIAE  
VICINIA • VNIVERSA  
SACRIS • ANNIVERSARIIS • HONOREM • HABET

Et augent interdum hujus diei popularem frequentiam stae supplicationes ob impetrandam agrorum fertilitatem, siquidem eodem tempore triduum occurrat indictarum precum, quas senariis hisce significatas intelligas :

Veris reduxit dies alma faustitas,  
Euge, quid times? duplicatis precibus,  
Caelestes modo quas effundunt proceres,  
Sperare laeta ipsi nos jubent auspices.  
Agrorum nempe custos bonus vigilat  
Non unus, tristes averruncans nebulas;

( LX )

Nec saeva grando tuis unquam frugibus  
Aut ventus urens aut loligo obfuerit ,  
Nil edax bruchus , nihil locusta vorax ,  
Non efferatae quae redundant pluviae.  
Tu cave mali vindicem doli Deum ,  
Cave, neglecta ne sit damno pietas :  
Iam vitis sera , jam ditabunt segetes ,  
Et plenis nihil trepidabis horreis.

Quod reliquum est , hinc tibi ad lacvam regresso altare  
se obferet Blasio Hieromartyri sacrum , cuius signum adfa-  
bre elaboratum duo alia decorant , alterum Erasmi antiqui  
Martyris , cuius diem festum colimus IIII. nonas Junias , al-  
terum Gothardi Episcopi Hildesheimensium , quem saeculo  
XI. floruisse comperimus (1); vitaeque functum IIII. nonas  
Majas. sed Blasii potissimum illustris fama , quem et Col-  
legium Faustinianum sollemni conventu honorat III. nonas  
Febr. et Curia ipsa titulo ad portam proposito memoriae  
commendat.

BLASIO • HIEROMARTYRI • SANCTISSIMO

CVRIA • TERTIA

VINDICI • ARTIVM • SALVTARIVM

VTI • POPVLO • VNIVERSO • PROPITIVS • SIT

Eundem cum aegrotantium multi propitium sibi expetunt ,  
tum vero ii maxime invocant , qui angina laborant : cuius  
rei caussa veterem quoque ritum plerique observant , ut ho-

---

(1) *V. Ferrar. in Catal.* 55. p. 183.

dierno die ad sacerdotis genua accidunt , quo decussatis candelis lustrentur: quos quidem hi versus ad majus pietatis studium hortantur.

Solator bone tristium salusque ,  
 Blasi, o si miseros benignus audis ,  
 Et preces bene supplicumque vota  
 Succedunt, age quaeso perrogantes  
 Tot jube modo languidos valere ,  
 Qui plaudunt tibi , dexteramque praebent.  
 Sed quos auxilio juvare pergis ,  
 Fac illos meminisse , quid reposit  
 Ipse auctor Deus omnium bonorum  
 Cui par est mage gratiam referre ,  
 Vnus qui dederit , fovetque vitam.  
 Jam docti sapient, datisque laeti  
 Debebunt tibi plura , quam petebant.

Sed jam nimis multa extra chorum , ut haec praeter argumentum addita queri possis. nonnihil tamen intererat , ut et de sacra aede aliquid saltem diceretur , cujus ambitu Michaelianam Cellam videas contineri.

## DE FESTO DIE PRINCIPIS ANGELORVM PRIMO.

VIII. idus Majas, qui dies octavus est a sacris sollemnibus duorum Apostolorum tutelarium, nova sollemnia instauremus honori magni Michaëlis, quem eo die a multis mortalibus in Gargano monte visum accepimus ostento insigni, quod tum omnium celebratione vulgatum est, Gelasio Pontifice Maximo rem confirmante, quam annus designat cccc. LXXXIII. vetustam autem narrationem Vghellius (1) aliique ediderunt, in qua legere est de spelunca in finibus Sipontinis divinitus electa, quae Michaëli sanctissimo sacra in ipso Gargani montis vertice jamdiu summa religione colitur, et clara prodigiis finitimos populos in tanti Patroni tutela esse portendit. ea porro memoria perennavit, perpetuoque Ecclesiae sanctae testimonio propagata perseverat.

Ergo et apud nos ejusdem diei manet auctoritas, nec quidquam eorum omitti solet, quae decorem apparatus elegantiamque augere possint. itaque et aedes tota sericis compta velaminibus renidet, et Cella in primis omni ornamento fulgens cives undique frequentes specie ipsa et dignitate invitat. adsunt sacerdotes sacris operantes, nec ministrorum copia deest, quorum opera sacrae caeremoniae peragantur, musici quoque concentus in promptu ad lacticiam, et in aedis etiam pronao festae hilaritatis indicia prostant. adsunt praeterea, qui populo sacras imagines et nominata diribeant,

---

(1) *Italiae sacrae T. VII. a p. 1107.*

( LXIII )

viris quibusdam eximiae pietatis adnitentibus, ut caelestis Patroni cultus religioque prorogetur. titulus quoque de ea re prostat ad portam, isque bis propositus, ut duplex diei festus indicetur:

MICHAELI

INVICTO • BELLIPOTENTI

PRINCIPI • ANGELORVM

CVRIA • TERTIA • POPVLO • BIFARIAM • SVPPlicANTE

HONORES • ITERAT

IMPLORATISQVE • PRECIBVS • VOTA • SOLVIT

Accessit interea nova caussa, quae piorum animos accenderet, faustus implorati patrocinii eventus, et vulgata beneficiorum caelestium fama, quam et tabellae votivae comprobant, ut senarii subiecti indicant:

In beneficio crede non vides omnia:

Plaudis, quod aegrum Michaël morti surpuit,

Aegrum Damona mortis ipso in limine.

At plaude quaeso magis, quod interitum

Damon superno auxilio aeternum fugerit.

---

Puellam febris Nicen urebat gravis,

Amissam mater moesta flebat filiam:

Sed ille ab arce caeli praesens adfuit,

Cui parent magni principes caelestium;

Nec mora, hunc statim utraque sensit praestitem.

Nam duplicem sanavit aegritudinem,

( LXIV )

Iam nata matri, natae matre reddita.  
Benigne factum sibi quae norant, illico  
Lubentes ambae votum solvunt merito.

---

Qui crure nuper saucio prorepere  
Frustra ausus vitam tristis trahebam domi,  
Tuo repente, Michaël, de munere  
Aram clientes tibi quàm sacravimus  
Vt vidi, utroque constitui rectus pede.  
Caelestis nosco praesens auxilium Ducis,  
Perennes memor tibi acturus gratias.

Sed illud maxime valere debet, quod sanctorum virorum exemplis commendatur, qui jampridem magni Archangeli et virtutem reveriti sunt, et benevolentiam promeruerunt. hos inter ille immensae prolis auctor mirabilis eminet Franciscus Pater, quem utinam omnes pari studio nobis ad imitandum proponeremus. hic olim quum in Apuliam venisset, sitam in Gargano speluncam invisurus invicti Archangeli praesidio et virtute venerabilem, oppidani, quibus viri sanctitas ignota non erat, dignum plane habuere, quem ad accessum aliis fere interclusum invitarent. nec tamen ille ausus eo pedem inferre, substitit ad fores supplicaturus: et tantam loci maiestatem ob Angelorum frequentiam esse affirmabat, nemini ut procedendum interius arbitraretur. atque idem tamen, quum summum Archangelum omni obsequio coleret, propitium sibi habebat ubique, impetravitque, ut in quadragenario illo jejunio, quod honori ejus quotannis servabat, novo prodigio mira secum divini amo-

ris vestigia referret, auctoris sui muneribus dives, a quo jam caelestem in patriam vocabatur.

Ipsam denique speluncam multorum saeculorum fama illustrem, et advenarum frequentia per omnes aetates nobilitatam hi versus commendant.

Num scopulos inter rudibusque horrentia saxis

Antra erit, o Michaël, haec tibi cara domus?

Nae erat: hospitio postquam tua reddita tanto est,

Illico cuncta tuo pulcra decore nitent.

### C A P V T III.

#### DE FESTO DIE PRINCIPIS ANGELORVM SECVNDO.

Quem diem festum Archangelo sanctissimo sacrum ordine secundum dicimus, is dignitate prior est, qui et in quadriduum protenditur. nam vi. kalendas Octobres incipit apud nos supplicatio trium dierum libello indice, quid quoque die praestandum sit: eosque dies multorum pietas facit celebratiores, at iii. kalend. Octobres religionem in primis et laetitiam passim eminere videas. ab ipso solis ortu sacram aedem vicinia tota frequentat, sacerdotes adsunt sacra facientes, collucent circum faces, serica de more ornamenta Cellae potissimum splendorem augent. hora antem indicta sacrum sollemne adstante Collegio Faustiniانو incohatur. exinde Laudationem orator pronunciat, quam concentus subsequitur musicorum, conspirantisque populi comprobatio. neque enim quemquam videas, ad quem hujus diei studium gaudiumque pertinere non videatur. haec inter tamen eorum maxime pietatem elucere animadvertes, qui unum illud cor-



di habent, ut a caelesti Patrono precibus suis certi aliquid eliciant de suo exitu: rati ab eo fortasse se scire id posse, quod ille nempe jam novit, quos in caelum sit Deo propitio inducturus. fuit et quidam, qui sibi rem tantam prodi divinitus postularet, quod utique cui non jucundissimum futurum sit?

Salve dux bone caelitum,  
 Auspex militiam qui regis inclitam:  
 Salve maxime principum,  
 Vnus qui superùm singula noveris  
 Doctus nomina civium,  
 Quos sanctis meritis sedibus inseras:  
 Si fas, dic age, num tuos  
 Inter me numeres, omnipotens quibus  
 Arces adtribuit Pater  
 Tecum perpetuas, praemia fortium?  
 Hoc me nunc doceas velim,  
 Hoc me scire juvat: dulcius et nihil  
 Caelestis mihi nuncius  
 Optanti adveniens, o Michaël, feres.

Eum vero a meridie rursus confluentium civium multitudinem spectare liceat, qui magnum Archangelum salutaturi propitium sibi eum fore sperant, nec Cellae ejus invisendae finem faciunt, certi jam se sine praemio non abituros. sub vesperam autem adveniente Clero psalmi rite concinuntur, et tota festi diei celebritas sollemni ministerio perficitur. nec tamen hic finis gestientis juventutis et laetitiae popularis.

Novum sub noctem spectaculum in promptu est. lucernarum ardentium pulchra et scita congeries longo ordine ul-

( LXVII )

tra viam Iacobeam resplendens, totumque suburbium illuminans, ab aede sacra initio ducto, quae fulgorem suum quaquaversus diffundit, et viciniam universam variata forma delectat. haec autem, si vacat, phaleuciis accuratius descripta legas:

Octobres modo tertius kalendas

Qui nobis nitet optimus dierum,  
Nullum tristitiae locum relinquens  
Huc ad gaudia nos vocat. favete:  
Solem nemo videbit occidentem,  
Insomnesque fluent libenter horae.  
Festus quippe diem dies reducit  
Depulsis vacuum omnibus tenebris:  
Iamque effusa iterum ruit juvenus,  
Et plaudunt pueri obviam, tuumque  
Gaudent, o Michaël, ciere nomen.  
Viden' ut facibus domus viaeque  
Accensis rutilant, simulque caelo  
Astra quot remeant corusca, longum  
Vt signant iter obstrepentis ignis?  
Sed via ante alias decora lato  
Iacobeia jubar refundit ardens,  
Et sacra reduces ab aede jungit  
Gaudentes iter invenire multis  
Novum civibus omen advenisque,  
Caret laetitia nihil, juvatque  
Adspectu variata contueri,  
Nec semel satis adfuisse: rursum  
Occurrunt cupidi videre, mira  
Si quisquam sibi contigisse narret,

( LXVIII )

Nam sperant merito parata , si quos  
Adduxit pietas amorque veri.  
Felix qui didicit relata caelo  
Ostenta et placidas quietus auras,  
At felicior ille, per supernos  
Qui tractus levis aureas quadrigas  
Hos inter potuit tueri, et almi  
Adspectum Ducis, ipse dum beatam  
Praesens auxilio revisit urbem,  
Et sperata amat adtulisse dona.  
Hoc te nunc populus rogat , petenti  
Da bone o Michaël , tuaeque nunquam  
Dicit immemorem benignitatis.

Illud demum ad commendationem civium nostrorum mire  
facit , quod in magna illa laetitiae significatione iteratisque  
plaudentium vocibus turbarum nihil uspiam sit, quod offen-  
dat , aut alacritati modum defuisse declaret.

( LXIX )  
CAPVT V.

DE SODALIBVS MICHAËLIANIS.

Quamquam a parvis vel magna initium habere solent, ipsum tamen incliti Archangeli nomen effecit, ut sodalitatis ejus exordium incrementa apud nos haberet illustria. ex quo enim Cellae nostrae peracta dedicatio est, complures illico exstitere, qui se in numero Cultorum tanti Patroni recenseri vellent. itaque mira animorum consensione data nomina sunt, et societas coaluit profitentium palam in ejus se tutela perpetuo fore. atque hi quidem hoc jamdiu servant, ut Cellam hanc nostram religionis ergo fere quotidie invisant, eodem amicos supplicatum adducant, studiosorum cultum ornatumque augere pergant. illud praeterea in votis est, ut quotannis sollemni ritu Sodales vicinia procedente in Basilicam usque conveniant, ut illic stato tempore horam de quadraginta peragant, quae adorationis causa publice de more celebrantur.

Ea etiam Sodalium cura esse solet, quoties alicujus e socii vita periclitatur, ut ad preces fundendas plerique coeant, accensisque in altari facibus de causa supplicationis admo-  
neant. quamobrem vota saepe piorum duplicantur, horumque causa sanctissimi Archangeli patrocinium properatis auxiliis urgetur. id ipsum subjecti versus designant.

Quam bene vos pietas, socii, facit esse sodales,

Quam bene perpetuo foedere junxit amor?

Mutua sic crevit studiis accensa voluntas,

Et mea multorum sunt bona, suntque tua.

Singula nam vobis Michaël communia fecit,  
Concordi veniunt quae simul ex animo.

Hic autem pietatis sensus eodem tempore ad feminas quoque manavit, quae jamtum stipem etiam in Cellae ornamenta sponte contulerunt, nomen scilicet suum extare cupientes, ut antiquae religionis et perpetui studii sui monumentum esset. audi quaeso eas, nam interest, a caelesti Patrono quid petant, senariis hujusmodi adscriptis:

Ave nuptarum custos, ave virginum  
Potens tutela, castus cui placet pudor,  
Cui carum semper decus est modestia:  
Habe magnorum Princeps o caelestium,  
Quid omnes tibi supplicantes poscimus  
Sodales inter studio non ultimae:  
Deliciarum primum ut delectet nihil,  
Aut leves forma fallat elegantior;  
Non ulli dites esse sit pulcherrimum,  
Aut viros invenisse de primoribus:  
Sit virtus cordi, sit justitiae soror  
Incorrupta fides comprobante numine:  
Regnare tecum uti beatis liceat,  
Vnum spectare quod morituros juvat.

Atque haec quidem diu mansura speramus, quod primum pietas sequentium pietatem auctura videatur. virtutem quippe exemplis ali manifestum est, nec deficere simul omnia solent, quae varia succedentium aetate recepta et communi studio probata sint.

( LXXI )  
CAPVT VI.

PRECES PIORVM.

**L**iceat hic adponere, quae Cultores tanti Patroni, quoties religionis caussa Cellam hanc nostram tamquam beneficiorum fontem adire solent, sibi ex animo et propinquis et amicis postulare non desinunt, hisce interdum alijsve formulis, quas exhibemus.

O • CAELESTIVM • PVLCERRIME  
HONORE • FVLGENS • SVPERNISQVE • INSIGNIBVS  
DIVES • THESAVRIS • OMNIBVS  
VIRTUTE • POTENS • MVNERATOR • SPLENDIDE  
CONTRA • INSIDIANTES • HOSTES  
TVAE • NOS • TVTELAE • CREDITOS  
SERVA • TVERE • VINDICA

---

O • VICTOR • HOSTIVM • MAXIMORVM • MAXIME  
CVI • FVROR • CESSIT • IMPIVS • REBELLIVM  
OBMVTVITQVE • VIS • DEPVLSA • TARTARI  
PERGE • TRIVMPHATOR • INCLITE  
PERGE • RABIDOS • COMPESCERE  
EREBOQVE • CLAYDE • AVRIVM • MINITANTES

( LXXII )

INVICTE • VBIQUE • OMNIBVS • VICTORIIS  
VENI • O • SOLATOR • EXTREMORVM • TEMPORVM  
VLTIMA • QVOQUE • TE • VICTORIA • MANET  
ANTICHRISTI • CAEDES  
OMNIBVS • FINEM • ADLATVRA • CLADIBVS  
EXINDE • TV • PRAESENTES  
DE • SANCTIS • ADVOLANTES • ARCIBVS  
FAC • NOS • VICTORI • PLAUDERE  
CAELESTIS • SOCIOS • FELICITATIS

---

VIVS • QVI • IVDEX • OMNIUM  
SVPREMO • DIE • VBI • REORVM • CRIMINA  
VINDICATVRVS • ADERIT  
EXPLICA • SANCTE • SIGNIFER • VEXILLVM  
VT • TE • SEQVAMVR • AVSPICEM  
PARTA • VICTORIA • LAETI  
ET • DERELLATIS • IMPIORVM • GREGIBVS  
PAREM • CAELESTIBVS • ADPETAMVS • GLORIAM

---

O • BEATORVM • CAELITVM  
MIRABILES • EXERCITVS  
QVIS • NUMERVM • QVIS • VESTRA • NOSSE • MERITA  
QVIS • VIRES • ADSEQVI • MENTE • QVEAT  
SED • TANTORVM • PRINCIPVM  
HOC • DIDICI • TE • MAGNVM • ESSE • PRINCIPEM  
QVANTVS • ES • MIHI • SANCTE • MICHAEL  
QVI • PRAESTO • TAMEN • ADES • INVOCANTI

( LXXIII )

TE • PROTEGENTE • MICHAEL  
NON • ATRA • MORBORVM • COHORS  
NON • IPSA • PFSTILENTIAE • VIS • ME • TERREAT  
QVID • HOSTILES • INGRVANT • SI • COPIAE  
ASSYRIORVM • ME • CLADES • EDOCET  
QVID • TVA • POSSIT • DEXTERA  
VNA • QVAE • CVNCTOS • NOCTE • SVSTVLIT

---

O • PRINCEPS • ALME • MICHAEL  
QVANDO • QVID • PETAM • NOSTI • VNVS • MAXIME  
AVDI • CLAMANTEM • INTVERE • SVPLICEM  
VOLO • ME • AMES • VOLO • ME • IPSE • COGITES  
SIM • TVVS • AEVVM • DVM • BREVE • LABITVR  
IDEM • ME • DEIN • MERENTEM  
SANCTAS • AD • SEDES • TRANSFERAS

---

ALTOR • VIRTVTVM • MICHAEL  
ET • CVSTOS • INNOCENTIAE  
AVDI • DE • CAELO • QVOD • VOVEMVS • SVPLICES  
TE • PRIMVM • PVERI • QVI • NOVIMVS  
VITAM • NIMIRVM • VT • VIVAMVS • PVRIOR  
ET • MALOS • VT • VITEMVS • INSIDIARVM • DOLOS  
CAELESTEM • PATRIAM • PARATI  
MVTARE • TECVM • OMNIBVS • DIVITIS



( LXXIV )

RESPICE • SANCTE • MICHAEL

IAM • GRAVES • ANNIS

IAM • CANOS • MORTE • INGRVENTE • SENES

HI • TE • VOCANT • INCLAMANTQVE

ALME • DVCTOR • DECEDENTIVM

AGE • IN • PATRIAM • QVAM • QVAERYNT • SVSCIPE

LAVS • HAEC • ET • GLORIA • TVA

NVLLI • DEFFVISSE • SVPPPLICANTI

Hic demum opellae nostrae sit finis, ne plura jam et majora disserendo audere videamur, quam ipsa rerum magnitudo ferat, et tantae amplitudini favere possit. et pauca quidem, Michaël sanctissime, de laudibus tuis delibare ausi sumus: ea tamen ipsa ejusmodi sunt, ut nemo aequare dicendo possit. coquis enim dignitatem unquam tuam, vel honores, vel res gestas, vel merita ipsa ita attingit, ut quantum par esset, ea vel mente adsequeretur, vel oratione explicaret? itaque sublimia haec et maxima venerati, hoc potius a te supplices petimus, ut de amore tuo erga nos, deque tuo nostrae felicitatis studio gaudere patiaris: qui nempe nos omnino ita diligis, ut aeternae vitae socios perpetuo esse velis, et tecum jam caelestium praemiorum participes destinaveris. respice igitur nos in primis cultores tuos, qui plurimum de tuo patrocinio laetantur; auge idem religionem omnium, pietatem tuere, fac ut inania quaeque et aliena negligant, rerum divinarum cognitione delectentur, te ipsum sibi magno animo ad imitandum proponant: ita fiet, ut de beneficiis tuis nihil pereat, et quae te fautore incohata divinitus sint, ea denique perfecta videamus.

EXPLICIT.

---

**TESSERAE PASCHALES**

---



MICHAEL FERRUZZIUS.

*T*esseræ Pâschales quæ sint, et quo consilio a Morcello exaratae, omnibus facile ex ipso nomine innotescet: at quomodo in manus meas primum devenerint, ac subinde ad illas evulgandas animum adjecerim, non item. de his propterea, Lector candide, paucis te monitum volo, ne scilicet prætermissione mea laudis partem, quæ ad me nullo modo attinet, in me ipsum derivare velle videar. neque enim dissimulandum puto me tesseræ hasce Andreae Andreio (1) acceptas debere; quem paucis abhinc mensibus una cum Paulo Bedoschio (2) Bononiae ex itinere subsi-

---

(1) Hic ille est Andreus, quo potissimum curante Morcelli nostri Electorum libri duo, et Parergon inscriptionum in lucem jam prodire. quanti porro virum hunc ingenio aequæ ac moribus spectatissimum Morcellus faceret, discere licet ex epistula Parergo præposita, in qua juventutis Clarensis princeps appellatur. quæ scilicet laus eo pluris aestimanda est, quod a viro profecta nunquam ornatiùs dicente, quam veritas ipsa ferat.

(2) De hoc semel iterumque mentio est in Agapeis, quorum editio illi debetur uni. Bedoschius autem a Morcelli excessu Præpositus Ecclesiæ Clarensis merito renunciatus est; quæ quidem renunciatione Clarenses universos mirifice lætatos accepimus: norant quippe viri pientissimi vigilantiam et assiduorum laborum patientiam, ex quo Canonici Curionis munus in Basilica Faustianiana obire coepit.

stentem quum convenissem , et sermo inter nos de Morcello injectus esset , perhumaniter ille pollicitus est se missurum mihi inscriptiones hasce , quas Morcellus singulis ferme annis , quibus Ecclesiae Clarensi praefuit , mira quadam varietate concinnaverat , ut viritim iis diriberet , qui e populo suo ad sacram Synaxin per Paschales ferias accessuri essent , eorumque animos ad religionis pietatisque officia excitaret. et Andreius quidem , qua est benignitate prorsus singulari , celerius opinione promissum solvit suum. ego vero , qui nuperrime negotiatori huic librario nostro auctor fueram , ut Agapea et Michaelia uno volumine excuderet , haud abs re fore duxi Tesserar Paschales iisdem subtexere , id quod ipsae etiam jure quodam suo postulare videbantur. nihil enim opportunius atque utilius esse intellegebam , quam in unum isthaec congerere , quae minutissimis schedulis inpressa quum vagarentur , haud difficile aliquando factu erat , ut schedulis vel partim vel omnino anassis , non exiguum ex earum amissione Latinae litterae detrimentum facerent. benevole igitur accipiant , qui Morcelli nomen permagni habent , meam hanc , qualiscumque est , diligentiam ; quum namque pauca ingenio praestare ipse possim , quod diligentia possum , id saltem praestare mihi semper sollemne erit.

( LXXIX )

ANNO · M · DCC · LXXXVI ·  
SANCTA · DE · ALTARI · LIBAVI  
ACTO · PASCHATE · CVM · CLARENSI · POPVLO · DEI  
IN · BASILICA · FAVSTINIANA

---

FESTIS · PASCHALIBVS · ANNI · M · DCCC · III ·  
IN · BASILICA · FAVSTINIANA · ECCLESIAE · CLARENSIS  
D · N · IESVS · MENSA · ME · SVA · DIGNATVS · EST

---

PASCHA · QVOD · EGERIS · CVM · CLARENSI · POPVLO  
AN · M · DCCC · IIII · IN · BASIL · FAVSTINIANA  
TESSERAM · HABE · CATHOLICAM · DE · MENSA · DOMINI

---

AN · M · DCCC · VI · ADFVI · IN · BASIL · FAVSTINIANA  
AD · PASCHA · SANCTVM · CVM · CLARENSI · POPVLO  
ET · PAVIT · CHRISTVS · ME · DE · MENSA · SVA

---

ANNO · CHRISTIANO · M · DCCC · VII ·  
DOMINVS · ET · DEVS · MEVS · IESVS  
PAVIT · ME · DE · MENSA · SVA  
AGENTEM · PASCHA · CVM · CLARENSI · POPVLO · EIVS  
IN · BASILICA · FAVSTINIANA

( LXXX )

ANNO • M • DCCC • VIII •  
PASCHATE • INDICTO • IESVS • ME • DEVS • CONVIVAM  
BENIGNE • ACCEPIT • INTER • CLARENSES • SVOS  
IN • BASILICA • FAVSTINIANA

---

ANNO • CHRISTIANO • M • DCCC • VIII •  
DOMINVS • ME • IESVS • CATHOLICI • PASCHATIS • MENSA  
DIGNATVS • EST • INTER • CLARENSES • SVOS  
IN • BASILICA • FAVSTINIANA

---

TESTIS • MIHI • BASILICA • FAVSTINIANA • CLARENSIVM  
QVOD • ME • DOMINVS • DEVSQVE • MEVS • IESVS  
AN • M • DCCC • X • PER • PASCHALES • FERIAS  
CAELESTI • CONVIVIO • DIGNATVS • EST

---

ANNO • CHRISTIANO • M • DCCC • XI •  
INTRA • PASCHALES • FERIAS  
GVSTAVI • DONVM • CAELESTE  
IN • BASILICA • FAVSTINIANA • CLARENSIVM

---

ANNO • M • DCCC • XIII •  
FERIAE • QVVM • ESSENT • PASCHALES • SVPLICEM • ME  
BASILICA • FAVSTINIANA • CLARENSIVM • VIDIT  
ET • DOMINVS • MEVS • IESVS  
PAVIT • ME • DE • MENSA • SVA

( LXXXI )

ANNO • M • DCCC • XIII • F • F •  
ME • QVOQVE • PASCHATE • INDICTO • CONVIVAM  
VIDISTIS • O • CLARENSES • DIVINAE • MENSAE  
IN • BASILICA • FAVSTINIANA • CLARENSIVM

---

ANNO • CHRISTIANO • M • DCCC • XV •  
BASILICA • ME • FAVSTINIANA • CLARENSIVM  
ACCEPIT • SVPPlicEM • ET • REX • MEVS • IESVS  
DONIS • PASCHALIBVS • DE • MENSA • SVA • MYNERAVIT

---

ANNO • CHRISTIANO • M • DCCC • XVI •  
PER • PASCHALES • FERIAS • DONVM • ACCEPI  
TE • IPSVM • IESV • SVAVISSIME  
CLARIS • IN • BASILICA • FAVSTINIANA

---

ANNO • CHRISTIANO • M • DCCC • XVII •  
PASCHATE • INDICTO • DATVM • ET • MIHI • EST  
VT • CAELESTI • CONVIVIO • INTERESSEM  
IN • BASIL • FAVSTIN • CLAR •

---

ANNO • CHRISTIANO • M • DCCC • XVIII •  
ACCESSI • PER • PASCHALES • FERIAS • AD • BASIL • CLARENS •  
IDI • DOMINVS • MEVS • IESVS • CHRISTVS  
CAELESTI • CONVIVIO • ME • QVOQVE • DIGNATVS • EST



( LXXXII )

ANNO • M • DCCC • XVIII •

PASCHATE • INDICTO • GAVDETE • CLARENSES  
VOS • DOMINVS • IPSE • IESVS • IN • BASILICA • NOSTRA  
AD • CAELESTE • CONVIVIVM • SINGVLOS • ADESSE • IVBET

---

ANNO : CHRISTIANO • M • DCCC • XX •

FERIIS • PASCHALIBVS • INDICTIS  
ME • QVOQVE • APVD • CLARENSEM • BASILICAM  
CAELESTI • CONVIVIO • DIGNATVM • SCITO

---

(1) ANNO • CHRISTIANO • M • DCCC • XXI •

TESTIS • MIHI • ESTO • BASILICA • FAVSTINIANA  
PER • PASCHALES • FERIAS • ME • QVOQVE • APVD • CLARENSES  
CAELESTIS • EPVLI • PARTICIPEM • EXSTITISSE

- 
- (1) Morcellus qua erat sedulitate in muneris sui partibus explendis, Tesseræ Paschales pro annis MDCCCXI., et MDCCCXII. præscripserat; sed maximo Europæ nedum Italiæ moerore decessit ipsis Kalend. Ianuar. an. MDCCCXI. quum esset annorum LXXXII. mensium XI. dierum XV.

( LXXXIII )

ECCE · FERIIS · PASCHALIBVS · ANNI · M · DCCC · XXII ·  
IESVS · IN · BASILICA · NOSTRA · SVPPlicantem  
DONO · ME · SVO · CAELESTI · DITAVIT

---

(2) ANNO · CHRISTIANO · M · DCCC · XII ·  
DISCE · EX · TESSERA · DATVM · MIHI · PASCHALE · DONVM  
IN · BASILICA · FAVSTINIANA · CLARENSIVM

- 
- (2) Superiorum tesserarum editio jam confecta erat, quum haec quoque ad manus meas pervenit. itaque hic illam, quamvis ordine haud apto collocatam, subicere potius visum est, quam omnino praetermittere.



## I N D E X

*Phrasium et Verborum dictionis notatu dignioris,  
quae passim in tribus libellis occurrunt,  
adjecta vernacula interpretatione.*

A. littera *Agapea* designat, M. *Michaëlia*,  
T. P. *Tesseras Paschales*.

## A

**A**bbas Pontevicensis. *A. pag.*

21. *Abbate di Pontevico.*

Abluo, is. Animi labes abluere.

*A. » 35. Confessarsi.*

A consiliis V. E. ( Viri Eminentissimi ) Praefecti criminibus expiandis. *A. » 14. Teologo del Cardinale Penitenzier Maggiore.*

Admissa rite accusare. *A. » 43. Confessarsi.*

Admissorum poena omni deleta. *A. » 23. Acquistata indulgenza plenaria.*

Aedes Mariana. *A. » 12. Chiesa di S. Maria.*

— Rochiana. *A. » 18. Chiesa di S. Rocco.*

Aedicula exstructa fuerat. *A.*

„ 22. *Erasi innalzato un trono.*

Aera de turri reboantia. *A. »*

17. *Le campane che suonavano a festa.*

Ago, onis. *A. » 15. Martirio.*

Anastasis D. N. ( Domini Nostri ). *M. » 57. Risurrezione di Nostro Signore.*

Angina, ae. Qui angina laborant. *M. » 60. Quelli che patiscono di schinanzia (male che viene alle fauci).*

Archipresbyter templi maximi Brixiani. *A. » 21. Arciprete della Cattedrale di Brescia.*

Archistrategus, i. *M. » 51. Vo-*

ce derivata dal greco ἀρχιστρατηγός, che significa generale, comandante.

A sacris Domus Pontificalis. *A.* » 16. *Capellano del Palazzo Papale.*

Australis porta. *A.* » 13. *Porta che guarda il mezzodì.*

Area templi suprema. *A.* » 22. *Quello spazio della Chiesa occupato dal Coro.*

## B

Basilica Faustianiana Clarensis, vel Clarensum. Basilica Clarensis. *T. P. passim.* *Chiesa Collegiata de' SS. Faustino e Giovita in Chiari.*

Bifariam. Mensae bifariam in longum productae quantum Basilica porrigitur. *A.* » 22. *Panche disposte in due file per tutta la lunghezza della Chiesa Collegiata.*

Bipartito. Longa serie bipartito perstabant. *A.* » 21. *Stavano divise in due lunghe file.*

## C

Caelestium habitu (pueri). *A.* » 20. *Fanciulli vestiti, come si figurano gli Angeli.*

Canonici Mariales. *A.* » 21. *I Canonici della Chiesa di S. Maria.*

Seniores. *ibid.* *I Canonici più anziani.*

Cella Eucharistica. *A.* » 22. *Capella del Santissimo Sacramento.*

Michaëliana. *M.* » 51. *Capella di S. Michele.*

Cientes novi. *M.* » 47. *Nuovi devoti.*

Commeatu impetrato. *A.* » 42. *Ottenuto il congedo.*

Convivium caeleste. *T. P. passim.* *Santissima Eucaristia.*

Corona subjecta. *M.* » 52. *Aggiuntovi inferiormente il cornicione.*

Cultores tanti Patroni. *M.* » 69. *I Devoti di sì gran Protettore.*

Collegium Faustinianum. *A.* » 21. *Il Capitolo della Chiesa Collegiata de' SS. Faustino e Giovita.*

## D

Decusso, as. Decussatis candelis lustrantur. *M.* » 61. *Siano benedetti con candele.*

*disposte a modo di croce.*  
 Defluo, is. Quum populus...  
 defluxisset. *A.* » 18. *Non*  
*essendovi più affollamento*  
*di popolo.*

Designatores. *A.* » 20. *Ordi-*  
*natori della processione.*

Dies Dominicus alter. *A.* » 34.  
*La seconda Domenica.*

Dies octavus a sacris sollempni-  
 bus duorum Apostolorum.

*M.* » 62. *Ottava della fe-*  
*sta dei due Apostoli.*

Donarium, i. *A.* » 39. *Offerta,*  
*che si fa a Dio, o ai Santi.*

## E

Effictus, a, um. Imaginis e-  
 xemplum in aere effictum.  
*M.* » 56. *Imagine del San-*  
*to incisa in rame.*

Epulum, i. Caelestis epuli  
 participem exstare. *T. P.* »  
 82. *Ricevere la Santissima*  
*Eucaristia.*

Evangelio prolato. *A.* » 23.  
*Cantato il Vangelo.*

Expiare rite labes animi. *A.*  
 » 22. *Expiarsi poenitentia.*  
*A.* » 15. *Confessarsi.*

Expiatus, a, um. Rite expia-  
 tum (Hypogeum). *A.* » 13.

*Benedetta secondo i riti*  
*della Chiesa.*

## F

Facio, is. Sacrum facere. *A.*

» 12. *Sacrificium facere. A.*

» 25. *Celebrar la Messa.*

Feriae Paschales. *T. P. pas-*  
*sim. Tempo Pasquale.*

Feriae sextae tres continentes.  
*A.* » 34. *Tre Venerdì con-*  
*secutivi.*

Fornix anaglyptis ornatus. *M.*  
 » 52. *La volta fu abbelli-*  
*ta di lavori a basso rilievo.*

Forum, i. Res in forum de-  
 ducta est. *M.* » 51. *Si eb-*  
*be ricorso ai tribunali.*

Franciscales Patres. *A.* » 21.

*I Padri di S. Francesco.*

Franciscus Pater. *M.* » 64.

*S. Francesco d' Assisi fon-*  
*datore di Ordine religioso.*

Funeratus, a, um. Ictu arboris  
 prope funeratus. *A.* » 41.

*Quasi ucciso da un albero*  
*che cadde.*

## G

Gusto, as. Gustavi donum  
 caeleste. *T. P.* » 80. *Ri-*  
*cevetti la Santissima Euc-*  
*ristia.*

## H

Haereo . Vox faucibus haeserat . *A.* » 43. *Aveva perduta la favella.*

Hypogei frons . *A.* » 29. *Facciata della Chiesa sotterranea.*

Hypogea quaquaversum colucente , *A.* » 28. *Illuminata tutta quanta la Chiesa sotterranea.*

Hypogeum Callisti . *A.* » 24. *Cimitero di S. Callisto Papa in Roma.*

## I

Iacobus Adelphoteus . *M.* » 58. *S. Iacopo minore Apostolo fratel cugino di G. C.*

Iejunium quadragenarium . *M.* » 64. *Quaresima.*

Includo , is . Muro infra inclusus est ( lapis ) . *A.* » 24. *Fu incastrata inferiormente nel muro.*

Intervertere pecuniam . *M.* » 51. *Intercettare, trattenere il danaro.*

## L

Labarum , i . *A.* » 21. *Stendardo: quel segno a foglia di banda, che porta-*

*no innanzi alcuni Cleri, quando vanno processionalmente.*

Lapis auspicalis . *M.* » 51.

*La prima pietra de' fondamenti.*

Laudatio , onis . Ab Evangelio pronunciata laudatio est disertoratoris . *M.* » 54. *Dopo il Vangelo da valente oratore fu recitato il Panegirico.*

Libare sancta de altari . *A.* » 15. *T. P.* » 79. *Ricevere la Santissima Eucaristia.*

Lipsana Martyrum . *A.* » 21. *Le reliquie de' Martiri.*

Lipsanorum sacrorum anniversaria sollemnia . *A.* » 34. *L'annua festa delle reliquie dei Santi.*

Loculus Martyris . *A.* » 24. *Il luogo del sepolcro della Martire.*

## M

Martyres ignoti . *A.* » 11. *Martiri senza nome.*

Magistri doctrinae Christianae tradendae . *A.* » 20. *I maestri della Dottrina Cristiana.*

( LXXXIX )

- Marmora peregrina. *A.* » 29. *Marmi forestieri.*  
O  
Opera, ac. Quum operae nunquam cessassent. *M.* » 52. *Non essendosi mai interrotto il lavoro.*  
Operor, aris. Sacerdotes sacris operantes. *M.* » 62. *Preti, che celebrano la Messa.*  
P  
Pasco, is. Episcopus de ipso sacrificio omnes (sodales) manu sua pavit. *A.* » 22. *Ves covo li comunicò tutti di sua mano dopo la consummazione.*  
Pegma, atis. *A.* » 23. *Pulpito.*  
Penulae sollemnes. *A.* » 21. *Ricchi piviali.*  
Periclitor, aris. De vita ob morbi vim periclitanti. *A.* » 43. *Ch' era infermo con pericolo di morte.*  
Pervigilium, i. *A.* » 18. *Veglia di tutta la notte.*  
Philippus Bethsaideus. *M.* » 58. *S. Filippo Apostolo.*  
Phonascus, i. *A.* » 20. *Capobanda musicale.*  
Pilis... additis sex. *M.* » 52. *Aggiuntivi sei pilastri.*  
Plasticus, a, um. Camera... opere plastico variata. *A.* » 29. *La volta fu adorna di lavori di stucco.*  
Pompa instituta. *A.* » 18. *Si cominciò la processione.*  
Pronaon, i. *M.* » 57. *Facciata della Chiesa.*  
Precor. Quum Clero populoque bene precatus esset. *A.* » 23. *Dopo data la benedizione al Clero e al popolo.*  
Psalmi Matutini. *A.* » 18. *Il Mattutino.*  
Psalmi Vespertini Episcopo praeunte decantati. *ibid.* *Si cantò il Vespro, che fu intonato dal Vescovo.*  
Purulentus, a, um. Ob nutricum alteram purulentam. *A.* » 42. *Per una delle mamelle, che le si corrompeva.*  
R  
Receptus, a, um. Sollemnia... Mariae Virginis sideribus receptae. *A.* » 32. *La festa dell' Assunzione di Maria Vergine.*



Remissio, onis. Poenae omnis remissio iis (est), qui rite expiati supplicatum accesserint. *A.* » 32. *Ervi indulgenza plenaria per chi confessato e comunicato visiterà la Chiesa.*

## S

Sacrum sollemne Episcopo adstante. *A.* » 23. *Messa cantata coll' assistenza del Vescovo.*

Septum marmoreum. *A.* » 29. *Balaustrata di marmo.*

Signum adfabre elaboratum. *M.* » 60. *Statua di ottimo scalpello.*

Signum, i. Ut arcae signa recognosceret. *A.* » 18. *Per verificare i sigilli della cassa.*

Sodales Albati. *A.* » 18. *Fratelli Bianchi.*

—— Atrati. *ibid.* *Fratelli Neri.*

—— Russati. *ibid.* *Fratelli Rossi.*

Sodalitas, tis. Sodalitates in templum venerant sanctae

Synaxeos caussa. *A.* » 22. *Le Confraternite eran venu-*

*te in Chiesa per ricevere la Santissima Comunione.*

Sororio, as. Ambas perendie sororiantes (nutrices) sensit. *A.* » 42. *Dopo due giorni si avvide, che amendue erano sane.*

Subselliarium, i. *A.* » 22. *Stalli del Coro.*

Supplicatio, onis. Statae supplicationes ob impetrandam agrorum fertilitatem. *M.* » 59. *Rogazioni minori.*

Suspendo, is. Pluvias suspendit. *A.* » 43. *Fè cessare le piogge.*

Synaxis, eos. Synaxin peragere. *A.* » 22. *Ricevere la Santissima Eucaristia.*

## T

Tabellae votivae. *A.* » 27. *Tavolette, che si appendono il più spesso alle pareti delle capelle a memoria di grazie ottenute da Dio per intercessione di qualche Santo.*

Tabula Teosiana. *M.* » 55. *Quadro dipinto dal Teosa.*

Tentorium, i. *A.* » 21. *Baldacchino.*

- Theca argentea . *A.* » 16. *Custodia d' argento.*      Tribunalia Sacerdotum . *A.* »  
22. *I Confessionali.*
- Tholus, i. *M.* » 52. *Cupola.*
- Thymiasma, atis. Oblato . . .      V
- thymiamate . *A.* » 22. *Dopo aver incensato.*      Valgus distortis cruribus . *A.*
- Tonitru tormentorum bellico-      » 41. *Silenco , colle gambe*  
rum . *A.* » 21. *Lo sparo*  
*dei cannoni.*      *storte.*

## INDICES

## RERUM VERBORUMQUE

## QUAERENDORUM CAUSSA.

## A

- A**edes S. Bernardi apud  
 Clarense . . . . . pag. 51.  
 Aeger solatio recreatus. » 37.  
 Agape Mart. vota perso-  
 luta . . . . . » ib.  
 Agape pro convivio . . » 23.  
 Agapes M. adventus. . » 16.  
 Agapes nomen ut latine  
 efferendum . . . . » 12.  
 Anastasis D. N. mendose  
 picta . . . . . » 57.  
 Anastasius Pont. Max. » 11.  
 Andreius Andreas lauda-  
 tus. . . . . » 14. 77.  
 Andreius Franciscus Can.  
 Clar. . . . . » 14.  
 Antichristi caedes . . » 72.  
 Assyriorum clades . . » 73.  
 B  
 Bedoschius Paullus Hy-  
 pogen praefectus. . . » 29.  
 — morbo recreatus . » 43.

- Bedoschius Paull. Praep.  
 Eccl. Clarense dictus. » 77.  
 Bellonius Iosephus Ar-  
 chipresb. . . . . » 21.  
 Blasius Pont. Mart. . . » 60.  
 Bolgenus Vincentius Theo-  
 logus. . . . . » 14.

## C

- Carolus sanctus Archiep. » 57.  
 Cella Michaëliana in sub-  
 urbio Clararum. . . » 51.  
 Clarense laudati . . » 56. 68.  
 Clarense sollicitudo de  
 municipum valetudine » 35.  
 Coemeterium Callisti » 12. 16.  
 Coloni Monticellense. . » 41.  
 Convivium pauperum . » 23.

## D

- Damoni valetudo resti-  
 tuta. . . . . » 63.  
 Dedicatio cellae Michaë-  
 lianae. . . . . » 53.  
 Depositio Agapes M. . » 30.  
 Depositionis dies qui . » ib.

Donarium Agape M. sa-	N
crum . . . . . » 28.	Nanius Ioannes Pont. . » 17.
Donarium Arruntiarum. » 39.	Nequam homo errores
E	detestatus. . . . . » 26.
Epitaphium Agapes M. » 24.	Nice puella febri sanata. » 63.
Erasmi M. signum. . . » 60.	O
F	Oratio a Praep. Clarens.
Faglia Angelus Comes. » 21.	habita . . . . . » 23.
Felix Martyr. . . . . » 13.	P
Feminarum Clarens. pie-	Paullinus Nolanus . . . » 13.
tas . . . . . » 75.	Pervigilium actum. . . » 18.
Florianus Martyr. . . » 12.	Pessimi homines ad pie-
Forestus Fortun. Anto-	tatem reducti . . . » 25.
nus Archipresb. . . » 26.	Pompae 'ordo. . . » 20. 24.
Formula supplicationis	Puella quae ex voto con-
Michaëli Archang. . . » 53.	valuit . . . . . » 27.
G	Pueri obviam progressi
Galli in Italiam infusi . » 34.	in adventu Agapes M. » 17.
Gelasius Pont. Max. . » 62.	R
Gothardi Episc. signum. » 60.	Redemptoris divini fe-
H	stum . . . . . » 34.
Hypogei frons exornata. » 29.	Rochiana aedes in subur-
Hypogeum Basilicae Cla-	bio Clararum. . . . » 18.
reus. reffectum . . . » 13.	S
K	Sacrum nomine Agapes
Katapania Catharina . . » 52.	M. factum . . . . . » 32.
M	Sodales Michaëliani . . » 69.
Mabillonii sententia . . » 11.	Spelunca in Gargano sita » 64.
Matronae Clarenses . . » 21.	Subselliarium Hypogei. » 29.
Michaëlis Archang. visus	Suburbium Clar. noctu
ad Garganum . . . » 62.	collucens. . . . . » 67.

( XCIV )

T	Translatio Agapae M. . » 20.
Tabula Teosae Michaë-	V
liana . . . . . » 54.	Via a Clarensib. ornata. » 21.
— haud recte im-	Z
probata . . . . . » 55.	Zanus puer visum rece-
Tesserae Paschales cur	pit . . . . . » 19.
exaratae . . . . . » 78.	



( xcv )

CONSPECTUS  
EORUM QUAE IN HOC VOLUME  
CONTINENTUR.

---

AGAPEA . . . . .	<i>pag.</i> 5.
Prooemium . . . . .	» 11.
CAPUT I. De festo Translationis . . . . .	» 20.
CAPUT II. De festo Depositionis . . . . .	» 30.
CAPUT III. De festis Conceptivis . . . . .	» 34.
CAPUT IIII. De beneficiis impetratis . . . . .	» 37.
MIXAHAEIA . . . . .	» 45.
Vota clientium novorum . . . . .	» 47.
CAPUT I. De cella Michaëliana Clarensium . . . . .	» 51.
CAPUT II. De altaribus aedis nostrae prioribus . . . . .	» 57.
CAPUT III. De festo die Principis Angelorum primo . . . . .	» 62.
CAPUT IIII. De festo die Principis Angelorum secundo. . . . .	» 65.
CAPUT V. De Sodalibus Michaëlianis. . . . .	» 69.
CAPUT VI. Preces Piorum . . . . .	» 71.
TESSERAE PASCHALES . . . . .	» 75.
Lectori. . . . .	» 77.
Index phrasium et verborum dictionis notatu digni- oris, quae passim in tribus libellis occurrunt, adje- cta vernacula interpretatione . . . . .	» 85.
Indices rerum verborumque quaerendorum causa . . . . .	» 92.

MAG 260566-1



241

242



